

弘

簡

錄

弘簡錄卷九十六

明刑部員外郎仁和弘齋邵經邦學

皇清翰林院侍講學士四世孫遠平校閱

天下 宋一之十三

寧宗皇帝諱擴光宗第二子母李皇后娠時夢日墮於廷用手承之以乾道四年十月丙午生於恭邸次年五月賜名十一月乙丑授右千牛衛大將軍淳熙五年十月戊午遷明州觀察使封英國公七年二月出就外傳九年正月加冠十年九月己巳始預朝泰十一年當出閣以兩宮寵愛不令在外命建第東宮之側居之十二年三月乙酉轉安慶軍節度使封平陽郡王八月辛酉納夫人韓氏光宗受禪加少保改鎮武寧軍進封嘉王始置翊善以沈清臣爲之帝自弱齡尊師重傅留正屢請立爲

儲嗣會孝宗崩光宗疾宰臣奏王仁孝夙成宜正儲位以安人心奏凡三上越六日從之提舉重華宮關禮使其姻黨宣贊舍人傅昌朝密製黃袍以進壬戌當禪祭趙汝愚率百官詣大行柩前太皇太后垂簾汝愚捧御批八字以進太后曰既有御筆卿當奉行癸亥擬后旨進云皇帝以疾至今未能執喪曾有御筆欲自退閑皇子嘉王擴可卽皇帝位尊帝爲太上皇后爲太上皇后太皇太后覽畢曰甚善甲子汝愚以后旨諭帝帝固辭曰恐負不孝名汝愚奏天子當以安社稷定國家爲孝今中外憂亂萬一變生置太上皇何地衆扶入重華殿東廡素幄改服黃袍却立未坐內侍扶掖乃坐汝愚率同列再拜稱賀帝起易衰服詣几筵殿伏哭盡哀須臾立仗訖百官班定帝出就素幄百官起居入行禪祭命建泰安宮以奉太上皇并后車駕五日

一朝百官月兩朝乙丑太皇太后命立崇國夫人韓氏爲皇后  
丙寅大赦百官進秩優賞諸軍以卽位告於天地宗廟社稷汝  
愚卽喪次名還留正戊辰詔求直言庚午朱熹詣行在戊寅秋  
暑太上帝后移御未便卽以寢殿爲泰安宮拜郭杲武康軍節  
度使郭師禹爲攬宮總護使壬午落侂冑階官擢汝州防禦使  
侂冑不悅力辭復進宜州觀察使甲申帝訪宰執侍從政治得  
失令兩省詳定應詔封事具要切以聞戊子詔百官輪對八月  
辛卯初御行宮便殿聽政癸巳朱熹奏五事除煥章閣待制兼  
侍講初講大學以所講編次成帙進日上閱懷容納甲午黃裳  
陳傳良彭龜年皆兼講讀官令開陳經旨敕正闕失丁酉立生  
日爲天祐節俄改爲瑞慶節己亥率羣臣朝泰安宮辛丑詔諸  
道舉廉糾汚乙巳復坐講禮丁未復罷丙辰內批罷留正以汝

愚爲右丞相丁巳詔侍從兩省臺諫各舉宗室有文學器識者  
二人通亮公清不植黨與曾任知縣者二人九月己巳命汝愚  
朝獻景靈宮庚子命伯圭朝饗太廟辛未親祀明堂大赦甲戌  
下詔撫諭諸將冬十月庚寅建東宮爲福寧殿更泰安宮爲壽  
康宮癸巳雷令羣臣各疏闕政庚子久雨命夾繫囚辛丑減兩  
浙江東西路和市折帛及蠲口鹽丁錢黎雅州蠻寇邊官軍土  
丁拒退降之甲辰用朱熹言趣後省看詳封事邵瑞慶節表賀  
乙巳上太行壽皇聖帝諡丙辰奠冊寶於重華殿閏月庚申吏  
部尚書鄭僑等請祧僖宣二祖正太祖東嚮之位立僖祖別廟  
以藏順翼宣三祖之主乙亥拜趙彥逾端明殿學士知建康府  
意亦不滿改除四川制置使戊寅朱熹上疏忤侂冑罷其侍講  
汝愚及臺諫給舍交章請留不聽壬午詔始改元十一月丙午

帝還大內庚戌侂冑兼樞密都承旨辛亥雨木冰升明州潛邸  
爲慶元府乙卯擢永阜陵十二月乙丑詔令近臣各舉爲諫官  
御史者侂冑與陳騭謀密諭中司令薦所厚善咸進言路以擯  
汝愚丁卯內批除謝深甫御史中丞楊大法殿中侍御史劉德  
秀劉三傑監察御史已巳劾罷陳傅良劉光祖庚午又引余端  
禮知樞密院事京鎰參知政事鄭僑同知院事至參知政事甲  
戌祔孝宗神主於太廟樂曰大倫之舞以陳康伯配饗丁丑德  
音減罪囚蠲擯宮役者賦是歲遣使金告禪位并報謝又賀生  
辰正旦金遣使來弔祭及賀卽位又賀瑞慶節并正旦兩浙淮  
南江東西路水旱振之仍蠲其賦

慶元元年春正月侂冑得政丙辰白虹貫日二月內批李沐爲  
右正言攻罷趙汝愚併罷兵部侍郎章穎知臨安府徐誼祭酒

李祥博士楊簡三月丙戌朔日食庚寅太白經天夏四月丁巳  
安置大府寺丞呂祖儉於韶州中書舍人鄧驛綴奏轉徙吉州  
庚申太學生楊宏中等上書請黜李沐留汝愚等詔各送五百  
里外編管五月戊戌下詔戒百官朋比六月癸酉更徙自保寧  
軍節度使提舉萬壽觀秋七月己亥太白晝見丙戌熒惑入太  
微垣冬十月乙丑升諸濟藩秀州爲嘉興府舒州爲安慶府嘉  
州爲嘉定府英州爲英德府十一月乙丑雨土戊戌率羣臣上  
太上皇尊號曰聖安壽仁丁未命宰執大閱是歲久雨都城兩  
淮兩浙大水臨安大疫賑貧民蠲租稅免身丁絹決繫囚二  
年春正月侂冑專政戊子雷庚寅用鄭僑知樞密院事二月知  
貢舉吏部尚書葉翥倪思劉德秀等論奏僞學之徒鼓動天下  
故文風未能丕變詔從其請禁六經論孟學庸等書并語錄之

類盡行除毀三月己亥上以嫡孫欲遵行三年喪制竊等因請以六月六日大祥從吉七月一日銜正殿祭祖廟從之丙午有司上慶元會計錄夏四月以葉翥僉書樞密院事五月辛巳旱禱於天地宗廟社稷詔諸司決繫囚辛卯賜進士鄒應龍以下及第出身凡稍涉義理悉見黜落甲午建華文閣以藏孝宗御集甲辰更慈福爲壽慈宮六月帝因太皇太后問禁僞學心知其非始降御札自今臺諫給舍論劄母及舊事務在平正以稱朕救偏建中之意胡紘請權住進擬僞學之黨會殿中侍御史黃黼又論治道在黜首惡不當留人過失於心侂冑黨皆怒罷其職而以姚愈代之丙子子竣生三月而秋七月癸未朔饗太廟戊子詔降德音量徙祖儉宏中等於內郡八月癸丑奉安神御於景靈宮九月甲午流星盡隕冬十月甲戌大閱十一月



庚寅上孝光二朝寬恤詔令 三年春正月壬寅朔帝御正殿  
受朝退朝壽慈壽康兩宮鄭僑罷二月己酉京鎰等上神宗玉  
牒高宗寶錄丁巳從大理司直邵襄然請自今權臣僞學黨與  
勿除在內差遣三月乙未建東華門夏四月壬子旱禱於天地  
宗廟社稷乙丑雨雹六月戊辰頒淳熙寬恤詔令閏月甲午大  
奚山島民犯私鹽提舉徐安國往捕作亂知廣州錢之望遣兵  
盡殺之秋八月戊子復置嚴州神泉監甲午均諸路職田九月  
壬寅四川旱詔蠲民賦乙丑詔凡監司帥守薦舉及遇大比漕  
司前期取家狀勿用僞學之人冬十月癸酉雷十一月辛丑太  
皇太后崩適郊禋期迫從侂冑議所費浩大不可已仍朝獻景  
靈宮太廟并加諡孝宗紹統同道冠德昭功哲文神武明聖成  
孝皇帝甲辰日南至祀圓丘大赦丁未始宣遺詔遣趙介使金

告哀十二月知綿州王沆請籍僞學擢爲利路運判籍首趙汝愚留正周必大王簡徐朱熹徐誼彭龜年陳傅良薛叔似章穎鄭湜樓鑰陳大中黃由黃黼何異孫逢吉劉光祖呂祖儉葉適楊萬里項安世沈有開曾三聘游仲鴻吳獵李祥楊簡趙汝諱汝談陳峴范仲黼汪遠孫元卿袁燮陳武田澹黃度張體仁蔡幼學黃灝周南吳柔勝李璿王厚之孟浩趙肇白炎正武臣皇甫斌范仲玉張致遠太學楊宏中周端朝張道林仲麟蔣傳徐範蔡元定呂祖泰共五十九人 四年春正月侂冑專政丙寅以葉翥同知樞密院事二月丙子上大行太皇太后諡三月甲子擢附永思陵乙丑金遣烏林答天益來弔祭遣湯碩等往報謝夏四月丙戌附主太廟五月丙子四川都大茶馬提舉丁逢入對論元祐建中調停之弊除爲軍器監一意禁絕僞學秋七

月辛酉葉翥罷八月庚辰白氣亘天丙戌太上皇聖躬康復率  
羣臣上壽尋不克行九月壬寅太白晝見癸卯經天丁未頒慶  
元重修勅令格式造新曆成賜名統天五年春正月侂冑專  
政太祖廟楹生芝壬戌建玉堂夏五月戊戌賜進士曾從龍以  
下及第出身戊申久雨臨安疫命振恤之壬子詔沿邊諸州武  
舉取士在內諸路州學置武士齋選官按武藝六月有盜竊太  
廟金寶秋七月劉德秀有罪免八月辛巳率羣臣詣壽康宮上  
壽成禮而還甲申中外奉表稱賀冬十月庚申朔陳自強上政  
目三十事十二月庚午命廣東諸州建安仁宅惠濟倉庫給士  
大夫死不能歸者是歲饒信江撫嚴衢台七州建昌興國軍廣  
東諸州皆水振之六年春正月侂冑專政己卯率羣臣上聖  
安壽仁及太上玉牒并聖政日曆會要於壽康宮三月辛未帝

從皇太后幸聚景園夏五月丙辰旱避殿求言壬申雨有司止  
慶元寬恤詔令役法撮要六月乙酉朔日食丁亥太上皇后李  
氏違豫赦戊子崩遣吳玠使金告哀秋七月己未初御後殿八  
月庚寅太上皇違豫赦辛卯崩於壽康宮喪服仍日易月遣李  
寅仲使金告哀乙未日中有黑子九月己巳命謝浚甫朝獻景  
靈宮不舉朝享太廟辛未上親祀明堂大赦丙子遣使金致遺  
留物冬十月辛丑雨土十一月己未皇后韓氏崩癸亥子增生  
未逾月妖丙寅東北地震上大行太上皇諡十二月辛卯攬永  
崇陵己亥金烏古論誼來弔祭遣虞儔往報謝癸卯祔神主太  
廟以葛邲配享詔改明年元乙巳黑子滅燭臨安紹興民緣攬  
宮役者賦是歲建寧府徽嚴衢婺饒信南劔七州水建康府常  
潤揚楚通泰和七州江陰軍旱振之

嘉泰元年春正月侂冑專政壬戌謝深甫等薦士詔中書籍名  
以待選擢丙子金完顏充來弔祭遣俞烈往報謝二月戊子詔  
求明曆之士甲午詔修光宗實錄乙未續修吏部七司法己亥  
四川初試教官辛丑雨土三月丙寅至己巳連雨雹戊寅臨安  
大火四日乃滅夏四月壬午避殿減膳下詔自責令密院嚴禁  
衛班直及諸軍營柵焚燬之數臨安府察姦民縱火者治以軍  
法內降錢米賑被災之家葬其死亡辛卯龍州蕃部寇邊官軍  
討之詔以風俗侈靡災後營造務遵法制內出銷金鋪翠焚之  
通衢禁民服用丁酉御殿復膳戊戌以潛邸爲開元宮五月戊  
午早禱於天地宗廟社稷詔諸司疎繫囚除茶鹽賞錢頒有司  
寬恤十有六條丙子雨丁丑雷雹六月丙午太白經天秋七月  
丁巳旱復行祈禱癸亥雨雹己巳復遣吳曦入蜀八月己卯滅

奏薦恩九月己未雨土甲戌令禮官纂集孝宗朝典禮冬十月  
甲辰編光宗御集是歲賑浙西江東兩淮利路旱災仍蠲其賦  
真里富國獻馴象二 二年春正月侂冑專政以知閣門事蘇  
師旦兼樞密都承旨丁卯陳自強等上高宗實錄二月戊子頒  
治縣十二事以風厲縣令癸巳禁行私史夏四月庚寅大雨雹  
五月甲辰朔日食己巳賜進士傳行簡以下及第出身六月己  
卯臨安火壬午濬浙西運河秋七月癸亥旱釋諸路囚命有司  
行寬恤七條庚午禱於天地宗廟社稷復行寬恤四事八月丙  
子以吏部尚書袁說友同知樞密院事癸未建寶謨閣藏光宗  
御集甲午浚甫等上慶元條法事類命頒之九月甲寅修皇帝  
會要壬戌奉安光宗慈懿神御於景靈宮萬壽觀庚午臨安野  
獸成鹵冬十一月甲辰始御正殿丁巳右文殿楹生芝十二月

甲申立貴妃楊氏爲皇后庚寅大閱閏月丁未詔講官隨事開  
陳經義乙卯子垌生未逾月歿是歲福汀劔寧瀘水邵州旱賑  
之三年春正月侂冑專政壬午置湖南路洞總首戊子龍州  
蕃部復寇邊遣官軍討之戊戌幸太學謁孔廟御化原堂命祭  
酒李寅仲講尚書周官篇遂幸武學謁武成殿監學官進秩推  
恩諸生賜帛有差二月乙巳袁說友參知政事翰林學士傅伯  
燕簽書樞密院事以老疾辭二月乙巳吏部尚書費士寅代之  
三月丁丑久雨決繫囚乙酉幸聚景園夏四月己亥朔日食壬  
寅福州獻瑞麥乙卯陳白強等上徽宗玉牒孝光二朝實錄五  
月庚辰旱釋囚癸未詔修三朝正史寶訓命有司搜訪舊聞來  
上以書進者賞之六月癸亥太白經天秋七月壬午白虹貫日  
八月丙辰自強等上皇帝會要九月庚午袁說友罷己丑詔南

郊加祀感生帝太子庶星宋星冬十月癸卯以費士寅參知政  
事華文閣學士知鎮江府張孝伯同知樞密院事丙午命兩淮  
諸州教閱民兵萬弩手戊申龍州蕃部山降十一月壬申加止  
光宗諡循道憲仁明功茂德溫文順武聖哲慈孝皇帝癸酉朝  
獻景靈宮甲戌饗太廟乙亥祀圜丘大赦庚寅復置福田居養  
院命諸路提舉常平司主之時金國多難侂冑思立奇功以爲  
不救之計十二月命張巖淮東宇文紹節淮西皆爲安撫使李  
奕荆鄂副都統兼知襄陽徙辛棄疾守京口起趙彥逾守四明  
丘密守金陵兼以襄陽鄭挺侍御史鄧友龍附和其說邊縣之  
開蓋始於此 四年春正月棄疾入見首言金必亂亡願付大  
臣備兵以爲倉猝應變之計侂冑大喜壬辰瓊州西浮洞逃軍  
作亂寇掠文昌縣遣兵討平之二月庚申夜有赤氣亘天三月



丁卯火迫太廟權奉神主於景靈宮己巳避正殿下詔罪己命振焚室修太廟百官疏陳闕失庚寅復御正殿夏四月甲午朔命內外諸軍詳度純隊法乙巳士寅知樞密院事孝伯參知政事五月乙亥詔諸軍主帥各舉將材六月丙申置諸軍帳前雄効補以襲厓子孫丁巳增廬州所招強勇軍千人秋七月甲子旱戊子命諸路措置保伍法八月乙亥自強等上皇帝玉牒戊午孝伯罷以張巖代之九月壬午遣鄧友龍使金賀正旦冬十一月壬申自氣亘天庚辰修六合縣城十二月癸巳詔總核內外財賦立考覈法自強兼國用使士寅巖同知國用事己亥詔改明年元取開寶天禧之義仍欲風勵諸將乃立韓世忠廟於鎮江封岳飛鄂王劉光世鄜王中興諸將畢以王矣

開禧元年春正月侂冑銳意用兵癸酉初置澈浦軍習水戰并

造戰艦壬午雨雹二月癸巳奪徐安國三官三月庚申太白晝  
見內出封樁庫金以待賞功命士寅鎮興元增招戢兵辭不赴  
罷之夏四月戊子朔錢象祖參知政事劉德秀簽書樞密院事  
辛卯轉李昉鎮江都統皇甫斌江陵副統守襄陽五月己巳賜  
進士毛自知以下及第出身以其廷對策言當乘機以定中原  
侂冑悅之故得首選甲申鎮江都統戚拱遣忠義人朱裕結弓  
手李全復漣水縣金國偵知川兵命平章事僕散揆爲宣撫使  
駐開封遣使來責渝盟六月辛卯詔內外諸軍皆爲行軍之計  
戊戌命諸路安撫使教閱禁軍湖北增招神勁軍己亥遣李壁  
賀金主生辰還奏乞斬朱裕梟首境上辛丑金復取漣水軍淮  
東安撫鄭挺坐擅納北人牛真奪官金聞之復弛備罷宣撫王  
寅天鳴有聲己巳焚惑犯右執法諫議大夫李大異諫止開邊

罷言職秋七月己卯上高宗御集八月丙戌朔旱決繫囚獨兩  
浙州縣贖賞錢癸巳雨乙巳以郭倪爲鎮江都統置殿前司神  
武軍五千人守揚州閏月戊寅上欽宗玉牒憲聖慈烈皇后聖  
德事迹九月丁亥劉德秀罷丁未欲審敵虛實遣陳景俊往賀  
正旦冬十二月復置和州馬監增刺馬軍司弩手戊寅金賀正  
趙之傑入見以其禮俗請帝還內更伺正旦朝見著作郎朱質  
請斬之不報祇奪館伴以下官是歲真里富國獻瑞象江浙福  
建兩廣諸州旱兩淮京西湖北諸州水暵之 二年春正月辛  
丑侂冑專政更名國用司曰參計所己酉大雷雨雹二月癸丑  
壽慈宮火太皇太后移居大內車駕月四朝乙卯避殿徹樂丁  
巳久雨決繫囚己卯復御正殿三月甲午頒開禧重修七司法  
已亥從太皇太后幸聚景園丁酉以伐金告於天地宗廟社稷

并詔四方已酉知處州徐邦憲入見請立太子因肆赦以弭兵  
侍御史徐枬劾罷之景俊還傳金主意謂不宜自敗盟好恐皇  
帝未知陳自強戒勿言用兵益決夏四月甲子拜薛叔似湖北  
京西鄧友龍兩淮皆宣撫使吳曦兼陝西河東郭倪兼山東京  
東鄂州都統趙淳兼京西北路皆招撫使皇甫斌副之金復以  
僕散揆完顏匡爲左右元帥會兵於汴丁丑鎮江都統陳孝廣  
復泗州江州統制許進復新息縣戊寅光州忠義孫成復褒信  
縣五月辛巳朔孝廣復虹縣建康都統田彬復壽春府賞功曲  
赦蠲租丙戌江州都統王大節攻蔡州不克軍潰丁亥皇甫斌  
引兵攻唐州不勝興元都統秦世輔出師至城固縣軍大亂甲  
午池州副統郭倬馬軍司李汝翼會兵攻宿州又敗壬寅太白  
晝見六月癸丑建康都統李爽攻壽州敗績侂冑聞諸軍敗始

覺爲師旦所誤奏劾除名安置籍沒其家甲寅罷鄧友龍奪官  
竄興化軍仍轉丘密江淮宣撫督視軍馬至揚州部署諸將悉  
三衙軍分守要害秋七月辛巳復紹興邊郡賞格八月丙寅有  
司上開禧刑名斷例壬申增御前強勇軍以淮東安撫司所招  
充之九月壬午金兵分道來攻蒲察貞取和尚原入西和州紇  
石烈執中自清河口渡淮圍楚州己丑朝獻景靈宮庚寅饗太  
廟辛卯合祭明堂大赦冬十一月庚辰命郭杲駐真州以援兩  
淮辛巳完顏匡破棗陽軍甲申金人犯神馬坡江陵副統魏友  
諒突圍趨襄陽戊子犯廬州田琳拒退之朝廷大震乙未避殿  
減膳命湖廣總領陳謙爲湖北京西宣撫副使丙申金人去廬  
州丁酉犯舊岷州守將王喜遁戊戌圍和州守將周虎拒之又  
破信陽軍辛丑圍襄陽壬寅破隨州癸丑太皇太后賜犒軍錢

百萬詔諸路招填禁軍以待調遣甲辰紇石烈子仁入真州自是濠州安豐並邊諸屯皆破十二月戊申完顏匡圍德安府守將李師尹拒之庚戌破成州守臣辛熈之遁吳曦反焚河池縣退屯青野原癸丑金人去和州攻六合縣郭倪遣前軍統制郭俱救之遇於胥浦橋大敗倪棄揚州走丁巳又破大散關曦屯興州戊午熈惑守太微癸亥魏友諒軍潰於花泉走江陵丁卯犯七方關興州中軍正將李好義拒卻之戊辰密遣使如金師議和僕散揆許之自淮南退師留一軍據濠州己巳謫郭倪果州副團練竄南康軍庚午罷叔似陳謙轉吳獵爲宣撫使癸酉曦自稱蜀王甲戌擢畢再遇鎮江都統權山東京東招撫司公事斬郭倬奪王大節李汝翼皇甫斌李爽官除名編竄遠州是歲雅州蠻高吟師寇邊官軍戰不利劄御前大軍討降之蒙古

奇渥溫鐵木真稱帝於斡難河滅乃蠻禽孟祿可汗以歸三

年春正月癸未金人破階州丁亥子圻生逾月復天甲午賧僭  
位甲辰罷陳孝廣奪三官二月壬子金師退御殿復膳甲寅削  
水軍統制福建總管商榮官爵放於柳州己未程松逃歸以楊  
輔爲四川沿江制置使葉適兼江淮制置使戊辰子城生踰兩  
月妖庚午四川轉運安丙監倉楊巨源與好義等共誅吳曦露  
布以聞獻馘廟社梟之於市併誅妻子徙家屬嶺南三月丙子  
朔以蜀平曲赦四川兩淮京西湖北罪囚并蠲役錢租賦壬辰  
興州將劉昌國引兵至階州金人退去癸巳好義復西和州丁  
酉張林李簡復成州忠義統領張翼復鳳州庚子賞功擢輔四  
川宣撫使丙副之夏四月孫忠銳復大散關己未遣方信孺使  
金國通謝議和壬戌詔吳玠兼四川宣議與輔議改興州爲沔

州分都統司軍爲十以其半屯利州置都副統制以李好義爲之癸酉金復破大散關五月除職黨張仲之等十六人名編配兩廣湖南諸州辛卯太皇太后有疾肆赦是日前六月癸亥遣富瑄使金告哀秋八月己巳上大行太皇太后諡九月丁丑詔諸帥臣和義未就申儆邊備辛卯擢趙淳殿前副都指揮使以代葉適辛丑遣王栴持書赴金帥府壬寅附主太廟冬十月丙午更殿前司純隊法乙卯復珍州遵義軍十一月甲戌奪侂冑官罷陳自強乙亥禮部侍郎史彌遠謀誅侂冑越五日始詔天下賞夏震福州觀察使將士加賚有差己卯詔中外臣僚各具所見以聞丙戌中丞衛涇簽書樞密院事己亥大赦十二月癸卯遣許奕使金通問癸丑金人復破隨州辛酉衛涇及給事中雷孝友並參知政事丁卯改明年元是歲浙西旱蝗沿江諸州



水除郭倪郭俱名竄遠州奪李壁張巖許及之薛叔似官安置  
諸州再貶鄧友龍皇甫斌除名徙循州并英德府皆侂冑黨也  
冊曰慶元不君政在權臣內奸正學外動強鄰流毒淮甸  
取怨縉紳至令吾道益遠益新姦邪自賊以滅其身

嘉定元年春正月戊寅從右諫議大夫葉時等請詔臨安府新  
侂冑棺梟首兩淮以謝天下辛巳下詔求言二月戊申除蔡璉  
名配贛州牢城命史官改紹熙以來侂冑事迹戊午柳州黑風  
峒寇羅世傳作亂招降之三月癸酉罪毛自知首諭用兵阿附  
奪其恩例仍下詔戒飭內外羣臣是春子埴生踰月復歿夏閏  
四月辛未置拘椎安邊錢物所壬申雨雹辛卯旱蝗禱於天地  
宗廟社稷癸巳減常膳蠲兩浙逋賦命諸司決繫囚丙申幸太  
乙宮明慶寺禱雨五月辛酉賜進士鄭自成以下及第出身丁

卯詔侍從臺諫疏奏闕政監司守令條上民間利害六月庚午  
金人歸大散關辛未歸濠州乙亥衛涇罷秋八月丙戌詔侍郎  
許奕舍人曾從龍攷訂監司守令所陳民間利害擇可行者以  
聞其未上者趣之九月辛丑和議復成金使完顏侃喬宇入見  
己未詔諭天下冬十月丙子雷孝友權知樞密院事十一月丙  
辰金主璟殂子允濟立遣會從龍弔祭宇文紹彭賀新卽位十  
二月庚午四川初行當五大錢己卯黎州蠻畜卜寇邊是歲發  
米二十萬石及出安邊所錢一百萬緡命江淮制司糴糴以賑  
流民仍貸二稅汰雄淮軍歸農揀刺淮東八千餘人以補鎮江  
及武鋒軍之闕淮西二萬六千以爲御前定武軍二年春正  
月庚子詔內外有司疏陳節用之事劾貪殘者丁巳以中丞章  
良能同知樞密院事二月壬午會子折閱日甚詔廷臣各疏稱

提之策丁亥罷法科試經義復六場舊法三月丙申雨雹臨安  
大疫賜病者藥及棺費夏四月戊辰汰廬濠二州忠義歸農五  
月丙申彌遠起復獨任爲相戊戌武訓郎羅日愿謀爲變伏誅  
六月戊辰奉安成肅皇后神御於景靈宮舉行寬恤之政五條  
命江西福建二廣豐稔之處糴運以給臨安仍償其費秋八月  
甲子聽兩淮沿江諸司行鐵錢已丑罷四川宣撫司以安丙爲  
制置大使甲戌皇太子受冊丁丑謁太廟九月己亥朝獻景靈  
宮庚子享太廟辛丑合祭明堂大赦冬十一月辛卯朔河州統  
制張林等謀亂事覺貸死除名羈置廣南黑風峒寇李元礪復  
作亂連破諸縣詔遣荆鄂江池四州軍討之十一月甲子四川  
制司調官軍討黎州蠻敗績是歲蒙古侵金諸路旱督州縣捕  
蝗揚楚衡郴吉五州南安軍盜起三年春正月彌遠專政甲

辰下詔招諭羣盜并戒飭監司郡守丙午雨土二月辛酉黎州  
蠻復寇邊壬午以工部侍郎王居安知隆興府湖南運判曹彥  
約知潭州督捕峒寇三月甲寅誅楚州渠賊胡海丙辰久雨兩  
浙衢嚴大水釋繫囚賑貧乏蜀逋賦夏四月癸亥李元礪犯南  
雄州官軍大敗五月乙未淮東賊悉平詔寬恤殘破州縣甲辰  
命兩省擇去歲應詔封事可行者以聞乙巳詔沿海諸州督捕  
海寇庚戌以江陵忠勇軍隸御前六月丁巳朔日食壬辰頒寬  
恤十有九條命有司舉行己卯詔三衢江上四川諸帥核實軍  
籍欺冒者以賊論是月池州副統許俊江州副統劉元鼎與元  
礪戰皆不利曹彥約亦爲所敗賊勢愈熾秋七月臨安府蝗出  
內帑錢賜軍民冬十一月癸巳賞楚州平賊功十二月丙寅湖  
南賊羅世傳縛元礪以降峒寇悉平辛巳黎州蠻請降四年

春正月彌遠專政乙丑叙州蠻寇邊攻陷嘉定府路店砦二月  
乙卯元礪伏誅壬戌賞平峒寇功授世傳通直郎尋復叛爲其  
黨所殺閏月辛亥罪諸路帥臣監司守令格廢振恤之令及盜  
發不卽捕者三月臨安大火遷神主壽慈宮三日火滅始還太  
廟丙子沔州將劉世雄等謀亂據仙人原伏誅夏四月國子司  
業劉鎬乞開僞學禁刊朱熹四書於太學己丑以吳曦沒官田  
租代輸關外四川旱傷秋稅丙午賜黑風峒名曰效忠置安邊  
司以經制蠻事命成都路提刑李璿漳州路安撫許奕共領之  
五月乙亥賜進士趙建大以下及第出身六月辛丑更定四川  
諸軍額秋七月壬戌太白晝見丙寅詔四川官吏嘗受僞命及  
附會開邊者毋得叙用丁丑聽凡軍興以來冒濫爵賞自陳除  
罪冬十月甲辰詔江淮京湖四川諸制置司金方與蒙古交兵

各謹邊備十一月乙酉朔日食十二月辛巳奉議郎張鑑坐扇搖國本除名象州羈管癸未以會子折閱不行遣官體訪江浙諸州是歲金以國難賀生辰使不至及遣使亦不至而還五年春正月彌遠專政已巳詔諸路通行兩浙倍役法著爲令二月壬午罷兩淮軍興以來借補官三月庚戌四川置司遣兵分道討叙州蠻其酋米在請降戊辰久雨決繫囚甲戌廣東湖南京西盜平監司帥臣進職有差夏五月癸酉安南國王李龍翰卒其子吳昌嗣遣使弔祭六月乙酉禁銅錢過江秋七月庚申賞降叙州蠻功戊辰雷雨太廟屋毀避殿減膳八月甲戌朔御後殿復膳九月己酉有司上續編中興禮書庚戌遵義砦夸楊煥來獻馬冬十月辛巳詔諸路總領安撫提刑歲舉堪任將帥各以名聞戊戌雷十一月庚申朝獻景靈宮辛酉享太廟壬戌

合祀園丘大赦十二月收兌第五界舊會 六年春正月彌遠  
專政庚申詔舉實材二月丙戌有司上嘉定編修吏部條法總  
類三月故遼裔耶律留哥取金遼東郡自立爲遼王夏四月丙  
子章良能參知政事甲午復法科試經義法雜流人不預五月  
丁卯旱命決繫囚戊辰修慶元六年以來寬恤詔令六月乙亥  
詔刑部歲終上諸州未決之獄最久者罪之八月己巳朔詔諸  
路監司帥臣舉所部官吏才行卓絕績用章著者庚午知思州  
田宗範謀作亂夔州安撫遣兵討平之金紇石烈執中弑其主  
允濟而立昇王珣來告九月丙戌命四川謹邊備甲午彌遠等  
上三祖下七世仙源類譜及高宗寶訓皇帝玉牒會要丙申下  
罪已詔冬十一月癸未虛恨蠻寇嘉定府中鎮砦是歲金遣賀  
正使來三遣使金俱不至兩浙諸州水湖北旱命有司賑恤

七年春正月彌遠專政安丙遣何九齡合官軍與金人戰於秦州敗績王大才斬九齡以其事聞時蒙古強盛於燕雲置行省命大臣撤沒曷領其事甲戌遣人夜至濠州抵鍾離北岸賁文并地圖一冊納地請兵守臣以不奉朝旨却之丁丑章良能卒乙未黎州蠻卜籠十二骨降三月丁卯拜安丙成都府路安撫董居誼轉制置使庚辰金國來督二年歲幣及止賀正使夏四月癸丑馬樵殺虛恨蠻庫崖等五月乙酉賜進士袁甫以下及第出身六月辛丑旱命諸路禱雨決滯訟蠲諸州贓賞錢丁巳置嘉定府邊丁二千以備蠻秋七月甲子朔左諫議大夫鄭昭先簽書樞密院兼權參知政事乙亥金人告還南京復督歲幣起居舍人真德秀請罷之董居誼初至四川夏人以書來議夾攻金人不報八月癸卯復建宗學置博士學諭各一人弟子



員百人九月壬戌朔日食太白晝見乙丑彌遠等上高宗中興  
經武要畧戊寅調殿前司兵增戊天長縣丙戌雨釋囚庚寅悉  
除兩浙茶鹽賞錢冬十月壬辰朔出內帑賑臨安貧民十一月  
丙戌命發浙東常平賑災傷州縣十二月金灘州紅襖賊李金  
寇掠山東 八月春正月彌遠專政詔舉將材二月丙午雷孝  
友罷己未雨土三月乙亥旱避殿減膳命釋繫囚辛巳應制科  
何致坐以妄造事端焚惑衆聽配廣西牢城夏五月辛未雨辛  
巳御殿復膳是月蒙古破金燕京火月餘不滅六月丙辰諭兩  
浙江淮民雜種粟麥麻豆有司毋收其賦田主毋貴其租秋七  
月辛酉鄭昭先參知政事丙子發米賑糶江東西民八月己丑  
蘭州盜程彥暉求內附董居誼却之九月己巳朝獻景靈宮庚  
午饗太廟辛未合祭明堂大赦是歲金國勢蹙蒙古并羣盜殘

破兩河有南窺淮漢之謀真德秀上備邊五事願以崇宣爲今日鑒九年春正月彌遠專政二月甲申朔日食辛亥東西兩川地震三月乙卯及甲子連震馬湖夸界山崩八十里江水不通丁卯壬申又震夏四月戊戌秦州唐進與其徒何進等引衆十萬來歸董居誼拒却之六月辛卯壬辰至乙未西川地連震黎州山崩秋七月戊申詔邊縣須才選擇不拘常法仍許起復其餘並遵三年之制冬十月癸亥甲子西川地又震十一月癸卯程彥暉攻圍鞏州迫及川界命利州副都統劉昌祖移駐西和州以備之十二月遷天水軍於舊天水縣置知軍以下官十年春正月彌遠專政辛巳雷癸巳雨土乙未大風拔木二月庚申地震陳伯震使金賀正旦還奏金主語乃詔江淮制使李珣京湖趙方四川董居誼各聽便宜行事酌量緩急措置調遣

夏四月金遣烏古論慶壽完顏賽不分道南侵犯光州中渡鎮  
執殺權場官盛允升戊申犯樊城江陵副統王守中拒之圍棗  
陽光化軍趙方遣統制扈再興鈐轄孟宗政赴救金人敗走辛  
酉至光山安昌砦廬州鈐轄王辛殺其統軍完顏掩金兵遁去  
和好遂絕五月甲申賜進士吳潛以下及第出身癸卯下詔伐  
金激厲將士募京西忠義人進討令方傳檄招諭中原官吏軍  
民六月辛未東川大水秋七月丙子朔日食知楚州應純之使  
高忠蛟沈鐸圍金泗州靈壁東海碓山等縣奏聞定遠民季先  
道山東豪傑願歸正之意甲申雅州蠻焚礪門砦遣兵討之八  
月乙丑詔舉將才冬十一月甲申詔浙東提舉司發米賑給貧  
民十二月戊申軍興募民納粟補官癸亥金鳳翔統軍完顏贊  
犯四川迫湫池堡破天水軍守臣黃炎孫遁遂破白環堡庚午

迫黃牛堡入大散關統制劉雄棄去是歲太白凡兩晝見經天  
夏水秋旱各釋繫囚 十一年春正月肅遠專政壬午李全率  
衆來歸勅李珪令慰接之壬辰利州將麻仲率忠義人焚秦州  
永寧砦詔准給賞與官軍同丁酉犯隔茅關興元都統李貴遁  
官軍大潰二月甲辰金人焚大散關而去大才馬蹶死於河池  
丙午金阿鄰破皂郊堡王師與戰勝負半之死者五萬戊申金  
蹇不圍隨州聚陽軍遊騎至漢上均州守臣應謙之棄城走丙  
辰白虹貫日楚州鈐轄梁昭祖焚金糧舟於大清河京東忠義  
副統沈鐸遣兵助之三月丁丑金焚湫池堡而去戊子利州統  
制王逸率忠義人復皂郊金統軍完顏贊包長壽遁去沔州軍  
士郭雄追斬贊長壽僅以身免辛卯忠義人十萬餘出攻秦州  
官軍繼進至赤谷口沔州都統劉昌祖令王逸傳命退師且放

散忠義人軍遂潰癸巳長壽合長安鳳翔之衆復攻皂郊戊戌  
入西和州昌祖暨守臣楊克家焚城棄去夏四月甲辰連破階  
成州守臣羅仲甲侯願咸遁戊午復犯大散關守將王立遁興  
元都統吳政拒退之執斬王立軍聲大振是月鎮江忠義統制  
彭惟城等敗於泗州五月癸未蚩尤旗見其長竟天丁亥詔侍  
從臺諫兩省官集議平戎禦戎和戎三策六月金黃榘阿魯答  
襲敗李全於莒州秋七月乙酉修孝宗寶訓九月巳卯朝獻景  
靈宮庚辰享太廟辛巳合祭明堂大赦丙申賞吳政張威功各  
進三官罪黃炎孫劉昌祖羅仲甲楊克家侯願各奪官安置諸  
州冬十月李全復密州獲黃榘阿魯答來谷寺家奴壬戌修肝  
胎城十一月壬申金人攻安豐軍之黃口灘十二月陝西張羽  
來歸金使呂子羽來求成至淮不納而去是歲戶部獻境內民

數戶一千一百六十六萬九千六百八十四口二千八百三十  
七萬七千四百四十 十二年春正月彌遠專政召董居誼還  
以利州安撫聶子述代之庚辰金復分兵大入其犯西和成鳳  
者守將石宣拒之於湫池堡董照拒之於白環堡趙彥呐殲之  
於西和州吳政拒之於黃牛堡大戰死之河池守將張斌鳳州  
守臣雷雲各棄城遁鳳州民與金巷戰乃奪其城金乘勝入武  
休關破興元府權府事趙希哲及李貴董居誼各遁遂破大安  
軍守臣李文子燕去犯洋州守臣蔡晉卿拒之不克張威遣石  
宣等邀擊大破獲其將巴土魯安金遂遁去追奪棄城等官贈  
吳政右武大夫忠州刺史其犯隨州棗陽者京西諸將拒之於  
信陽軍建康都統許俊却之於安豐軍又攻光州光化軍破鄖  
山縣進逼均州趙方遣扈再興救之不克復遣再興引兵三萬

出攻鄧州隨州忠義統領劉世興與鄂州統制劉世榮會兵攻唐州金人去復圍安豐軍滁濠光三州李珣命池州都統武師道忠義軍統制陳孝忠救之皆不克金遂分兵犯麻城和滁及全椒來安天長六合淮南民渡江避亂諸城悉閉金遊騎至東采石楊林渡建康大震李全及季先各引兵來援金始解去二月戊戌朔太白晝見巳酉遣殿前司八千兵防捍江西乙丑夏人復以書來議夾攻金人利州安撫丁燦許之三月巳巳以鄭昭先知樞密院事兼權參知政事乙亥興元卒權興等作亂犯巴州守臣秦季禔棄城去丁亥降之秋七月丙申張福莫簡作亂伏誅竄董居誼永州賞安丙功加少保癸亥李全引兵至齊州知州王贊以城降遂引兵東張林來歸九月丙午以寶文閣待制李大東爲沿江制置使罷江淮制置各置主管公事命淮

南運判趙善湘任淮西提刑賈涉任淮東兼節制京東河北路  
軍馬十二月丁丑雅州蠻入廬山縣焚礪門砦邊丁大敗金復  
犯鳳州之長橋己丑趙方扈再興等引兵六萬分三道出境以  
伐金是歲金人招諭李全不聽工部尚書胡榘欲與金議和太  
學生何處恬伏闕請誅之十三年春正月彌遠專政丁酉扈  
再興圍鄧州金人救之孟宗政捷於湖陽獲趙興兒鄧州都統  
許國攻唐州不克而還金人迫之遂寇樊城趙方督諸將拒退  
之三月辛卯朔雨土丁巳黎州土丁叛遣兵討降之夏四月賈  
涉招諭山東兩河豪傑勸以來歸五月庚寅朔雅州蠻降戊戌  
彌遠等上玉牒及三祖下第七世宗藩慶系錄六月癸酉賜進  
士劉涓以下及第出身秋七月戊戌以京東河北諸州守臣空  
名官告付本節制司以待豪傑之來歸者八月金嚴實以魏博



恩德懷衛開相等郡來歸李全會張林襲金東平敗績而還林復侵滄州金王福以城降癸亥皇太子詢薨壬申安丙遣夏人議定議夾攻金人癸未傳檄陝西五路招諭官吏軍民甲申復海州以將作監丞徐晞稷知州事九月辛卯夏人引兵圍鞏州且來趣師甲午命諸將分道進兵利州統制王仕信發宕昌撫司統制質俊李質發下城沔州都統張威出天水利州副統程信出長道興元副統陳立出大散關撫司都統田胄出子午谷金州副統陳昱出上津庚子質俊等克來遠鎮進攻定邊城金人來救擊破之辛丑仕信克鹽川鎮乙巳程信及仕信引兵會夏人於鞏州攻城不克庚戌金復犯皂郊堡沔州統制董照等與戰大敗壬子程信引兵趨秦州丙辰夏人自安遠鎮退師冬十月丁巳朔信復邀夏人共攻秦州夏人不從遂自伏羌城引

軍還諸將皆罷兵戊寅以逗留斬王仕信罷張威軍職十一月  
詔刊正皇帝日曆蒙古入金濟南府嚴實復降壬子臨安府火  
十二月壬申石珪張林復叛入於蒙古十四年春正月丙戌  
朔大雪乙未雷地震二月戊辰金圖光州已巳犯五關壬申治  
舟於團風弗克濟遂圍黃州知州何大節棄城遁州陷自沉於  
江金兵分破諸縣及漢陽軍甲申詔淮東京湖諸路趣援蘄黃  
沿江制司防守江面三月丙戌朔鄂州副統扈再興引所部趣  
蘄州庚寅長星見已亥蘄州陷知州李誠之死之癸丑金人退  
師再興邀擊於天長鎮連敗之夏四月戊辰金北渡淮李全遣  
兵追擊又敗之殲其大半五月甲申朔日食壬辰彌遠等上孝  
宗寶訓并今上會要丙申西川地震乙巳頒慶元寬恤詔令六  
月丙寅立貴和爲皇子賜名竑丁卯告於天地宗廟社稷乙亥

彌遠更謀補貴和弟與莒秉義郎爲右監門衛大將軍賜名貴  
誠丙子降德音減臨安囚罪釋杖以下秋七月丁亥鎮江副統  
翟朝宗於金師中得皇帝恭膺天命之寶來獻詔禮官議受寶  
儀制以聞丁未修光宗寶訓八月壬戌給事中俞應符簽書院  
事九月癸未立貴誠爲沂王後己丑朝獻景靈宮庚寅饗太廟  
辛卯合祭明堂大赦冬十月癸丑復滄州以趙澤知州事兼河  
北東路鈐轄甲寅復以齊州爲濟南府兗州爲襲慶府丙寅夏  
人復以書來趣四川會兵十二月庚申鄭昭先罷閏月辛巳朔  
俞應符兼參知政事是歲始遣使於蒙古通好蒙古亦遣使葛  
令赤孫來計事十五年春正月庚戌朔御大慶殿受寶大赦  
文武各進秩犒賞諸軍夏五月壬戌知濟南府和贊等伐青州  
張林敗走之己巳修孝宗經武要畧六月辛卯俞應符卒秋八

戊甲午彗星出氏九月彭義斌帥師復京東州縣金將晁海以  
青崖降辛亥給事中程卓同知樞密院事壬戌彗星沒冬十月  
丙子犒賞收復京東河北忠義十一月壬午肆赦十六年春  
正月己酉子坻生踰月復歿二月戊子兩土三月戊申張林所  
部邢德來歸詔進二官復以爲京東路副總管夏五月戊申賜  
進士蔣重珍以下及第出身六月丁酉程卓卒秋八月李全率  
師會金納合六哥於邳州不克進乃還九月庚子朔日食冬十  
月乙卯雷十二月癸未金主珣殂太子守緒立是歲賑江淮太  
平山東道州饑民命兩淮總領及沿江被水州軍募民入米補  
官十七年春正月彌遠專政補孔元用通直郎錄程願後三  
月癸丑雪金人引還夏四月乙未賜李全彭義斌犒賞戰士錢  
三十萬緡五月戊戌嚴實兩淮京湖四川江上諸軍之數六月

丁卯朔太白經天晝見金使李唐英來輸平壬辰大名府蘇椿等舉城來歸詔悉補官卽以知大名府秋八月丙戌帝不豫閏月丁酉崩於福寧殿在位三十年壽五十七諡曰法天備道純德茂功仁文哲武恭孝皇帝廟號寧宗

帝柔而不明姦邪得志忠正屏黜權臣交肆前有韓侂冑後有史彌遠中更吳曦悖叛至其末年金人擾亂蒙古又起江南震懼國勢以危雖有謙恭小善不足稱也然宋自太祖至於仁宗四傳而享國百年邵雍稱爲前代所無及南渡至寧宗亦四傳而享國九十有八年亦豈偶然也哉

冊曰國本屢移權姦無忌神器轉遷有同兒戲宋祚將終莫能自遂

弘簡錄卷九十七

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之十四

理宗皇帝諱昀太祖十世孫高祖子爽曾祖伯盱祖師意父希  
璵母全氏以開禧元年正月癸亥生於紹興山陰之虹橋里第  
前一夕父夢紫衣金帽人來謁比寤室中五采爛然赤光屬天  
如日正中既誕家人聞戶外車馬聲三日不絕亟出無所睹幼  
嘗晝寢人忽見其身隱隱如龍鱗時寧宗在位久屢生子皆不  
育選擇昭穆相當遂與兄竝皆入禁中教育如高宗故事竝爲  
皇子更以帝嗣沂王授臬州團練邵州防禦使素性凝重寡言  
潔修好學每朝隨衆待漏或多笑語獨儼然自持出入殿庭矩

度有常見者欽容丞相彌遠浚所屬意立爲皇子賜今名授武泰軍節度使封成國公崩日楊皇后矯稱遺旨命嗣皇帝位大赦尊后曰皇太后同聽政出前皇子玆居湖州癸亥詔於宮中服三年喪九月乙亥首獎老儒徵傳伯成楊簡柴中行等戊寅追封父榮王母榮國夫人以弟與芮襲封奉祀封開國子加食邑巳卯皇太后與帝並御便殿垂簾授先聖孫行可迪功郎以真德秀及侍郎程秘葛洪權吏禮工三部尙書並兼侍讀起居郎喬行簡宗正少卿陳貴誼軍器監王堅兼侍講辛卯祀明堂大赦冬十一月甲子右正言廖深進新政切要畏天悅親講學仁民一以孝宗爲法上嘉納癸未立生日爲天基節丁亥改明年元十二月癸丑開經筵從真德秀魏了翁言詔賜周敦頤張載程頤程顥官爵并與定諡

寶慶元年春正月壬戌朔彌遠專政殺濟王竑已丑上寧宗諡  
號卅寶三月甲午李全反焚楚州制使許國走死代以徐希稷  
命撫之三月癸酉擢永茂陵免役者稅夏四月辛卯朔祈廟丁  
酉皇太后手書多病免垂簾聽政五月甲子詔內外大小羣臣  
於國政有所見聞封章來上毋或有隱秋七月乙酉詔行大宋  
元寶錢八月壬寅獎直言進司農丞姚子才秘書郎癸卯詔旌  
廉吏以知袁州趙箴夫直秘閣提點福建刑獄已酉地震九月  
丙寅著作佐郎陶崇上保業慎獨謹微持久四事帝嘉納之冬  
十一月癸亥升邵州潛藩爲寶慶府筠州與御名相近改瑞州  
壬午給諸軍雪寒錢十二月戶部上兩浙路戶一百九十七萬  
五千九百九十六口二百八十二萬二千三十二福建路戶一  
百七十萬四千一百八十六口三百五十五萬三千七十九



二年春正月彌遠專政二月建昭勲崇德閣圖國初及近代功臣起趙普至趙汝愚凡二十八人三月癸酉久雨詔蠲權酒所贓賞等錢夏六月丙申御後殿賜進士王會龍以下及第出身壬寅襲封孔萬春衍聖公秋七月戊寅雷電蟄晦遂安休寧兩縣界山裂洪水壞公宇民居田疇冬十月甲申置寶章閣藏寧宗御集設學士待制等官辛亥改湖州爲安吉十一月丙辰始御紫宸殿丙子日南至上朝慈明殿十二月癸卯親享太廟三年春正月辛亥朔彌遠專政時上勵志講學觀朱熹集註學庸語孟發揮聖賢蘊奧有補治道己巳工部侍郎朱在進對奏人主學問之要上曰先卿中庸序言之甚詳朕讀之不釋手恨不得與同時三月庚戌朔詔郡縣長吏勸農桑抑末作戒苛擾夏四月戊戌納夫人謝氏五月壬子詔復岳珂戶部侍郎淮東

總領兼制置使閏月己卯朔詔憲司詳覆郡縣繫囚未經結錄  
輒行持判有歲月淹延者重寘於法蒙古滅夏以其主覲歸國  
亡六月戊申朔日食楚州忠義軍亂逐姚翀詔改爲淮安軍秋  
七月蒙古還南八月丙子城太平州進知州綦奎中奉大夫冬  
十一月戊寅加上寧宗徽號聖曆二字奉冊寶於太廟辛巳日  
南至郊大赦改元十二月蒙古兵破關外諸隘四川制使鄭損  
逃歸遂入三關鐵木真死於六盤山以少子拖雷監國西和州  
附知州陳寅等死之

紹定元年春正月丙子朔彌遠專政以桂如淵爲四川制置使  
翟朝宗知揚州權淮東制置司謹飭邊備以防蒙古夏六月壬  
寅朔日食冬十一月庚辰雷 二年春正月彌遠專政夏五月  
辛巳賜進士黃朴以下及第出身秋八月蒙古窩闊台立九月

江郡寇晏頭陀等嘯聚境上破寧化清流將樂諸邑迫近南劔  
州詔起復知州陳韓諭降蓮城等七十二寨誅晏頭陀冬十一  
月諭鄭損防趙海道三年春正月上飲宴過度適彌遠臥病  
朝野相語曰陰陽戢戢理天地醉乾坤二月戊戌詔復汀贛吉  
建昌凡蠻獠竊發經擾郡縣賦稅一年閏月癸酉李全使逃卒  
穆椿夜竊入皇城燒毀甲仗捕得磔之三月丁酉雨土夏四月  
己卯漳州連城盜起五月犯邵武軍劉純等兵敗死之寇平立  
廟以祀秋九月辛丑祀明堂大赦冬十二月庚申錄孔氏孫燦  
補官壬戌李全亂淮東兵官王青力戰死之贈右武大夫蘄州  
防禦使時彌遠氣體未安詔十日一起都堂治事丁卯冊立貴  
妃謝氏爲皇后己卯皇太后出緡錢犒諸軍并振在京細民  
四年春正月戊子彌遠專政壬寅諸將討李全伏誅夏四月賞

功進鄭清之趙善湘勲階趙范趙葵並中大夫右文殿修撰賜  
紫章服金帶雄邊軍統制總轄范勝谷汝礪等各轉五官五月  
范等復大敗餘黨全妻楊妙真奔於金淮安平六月己未叙復  
魏了翁真德秀尤焞尤煊洪咨夔官職祠祿秋七月丁酉封賈  
氏文安郡夫人八月己未蒙古兵破武休入興元攻仙人關遂  
入大散關破鳳洋沔州畧地至西水縣陷城砦百四十而還辛  
未進賈氏爲才人九月丙戌夜臨安大火延及太廟上素服視  
朝減膳徹樂宰執彌遠清之薛極喬行簡各引咎納職庚子建  
昌軍火冬十月戊午太常少卿度正國史編修李心傳疏言廟  
制未合於古宜緣災異舉行詔兩省侍從臺諫集議以聞癸酉  
蒙古兵破蜀口諸郡桂如淵逃歸戊寅以李璫代之利路安撫  
安癸仲爲戶部郎中總領財賦十一月乙酉御前中軍統制張

宣戰青野原有功擢河州都統忠義總管復力戰歿贈武節大  
夫忠州刺史加封立廟十二月金完顏合達遣劉天山至襄陽  
乞師及粟制使陳駘不許而還桂如淵褫職罷祠 五年春正  
月己丑彌遠專政起復孟珙京西兵馬鈐轄屯棗陽庚寅檢舉  
淮東檢法吳澄等前出城謁李全罪各追官勒停其不出見教  
授高夢月劉賓雲循升二資海陵簿吳嘉罵賊而死特贈朝奉  
郎官其一子壬寅新作太廟二月癸丑帝親謁之夏五月己丑  
詔復宰執等元官辛卯積陰淫潦歷春徂夏官僚言都大坑冶  
司魏峴誅求日增抑蘄州進士馮杰爲鐵戶妻妾子女相繼以  
死弟大聲赴愬亦死杰乃自經帝怒詔罷其職秋七月攝順慶  
承奉郎胡元琰能收散卒定居民諭叛將以全閩郡特轉三資  
丙戌贈監楚州大軍倉死難富起宗宣教郎官其一子同時被

害張煥轉官一資八月丁巳泗州路分劉虎副都統董琳焚斷  
肝泗橋遣金兵乙丑賜進士徐元杰等及第出身甲戌新作玉  
牒殿奉安累朝玉牒閏九月庚戌彗山於角宰執乞歸不允冬  
十月戊子大赦金納合買住以肝胎來歸詔改爲招信軍十二  
月丙子朔封賈氏貴妃辛巳皇太后不豫壬午崩羣臣七上表  
始聽政外朝大典不敢輕改宮中喪服三年是歲與蒙古合兵  
圍汴京金主奔歸德府再遣使議夾攻史嵩之令鄒仲之報謝  
六年春正月彌遠專政二月丁丑上大行皇太后諡夏四月壬  
寅朔永茂陵五月庚戌孟珙破走金武仙於順陽遂復鄧州守  
將移刺瑗以城降秋七月珙復敗武仙於馬蹬山降其衆而還  
八月拔唐州九月壬寅朔日食辛亥祀明堂大赦辛酉經筵官  
請以御製敬天法祖事親齊家四十八條及緝熙殿記宣付史

館冬十月京西忠順統領江海領襄軍合蒙古兵圍蔡州丙戌  
彌遠有疾謝政以鄭清之代之乙未堯帝始親政十一月乙巳  
會從龍宜緡免奪梁成大祠祿罷莫澤李知孝官丙午改明年  
元巳未賜真德秀魏了翁金帶起陳德剛福建制置使兼知福  
州戊辰洪咨夔王遂並爲監察御史劾陳賅與祠袁韶鄭損奪  
職趙善湘有討李全功特寢其命十二月庚辰薛極胡榘聶子  
述趙汝述皆罷

端平元年春正月庚子朔求直言令近臣各舉監司守令三衙  
統軍舉堪爲將帥者以鍾震陳公益李性傳張處並兼侍讀徐  
清叟黃朴李大同葉味道並兼說書戊申金主守緒傳位於宗  
室承麟巳酉蔡城破自經承麟爲亂兵所殺史嵩之還師屯信  
陽露布告金亡遣郭春按循故壤詣奉先縣汎掃諸陵朱復之

相度修奉命王旻守隨州王安國守棗陽蔣成守光化楊恢守均州並益兵餉備經理唐鄧屯田丙寅追贈本生四代子夷吳國公伯盱益國公師意越國公皆爲太師詔宗正司申嚴州郡以時贍給宗親無致失所違者有刑三月巳酉始用賈似道爲籍田令辛酉遣太常寺簿朱楊祖閣門祇候林拓省謁八陵丙戌以所獲完顏守緒遺骨并寶玉法物獻於宗廟社稷俘囚張天綱完顏好海等命有司審實以聞庚寅論功行賞投孟珙并官屬陳一薦江海等官金降人夾谷奴婢改姓名同鼎與王聞顯呼延實來伯友石大瑞白華各授官有差五月戊申太平州螟丙辰宰相清之力主趙范與葵欲乘時撫定中原守河據關收復三京之說命范與陳韓主之丙寅詔復黃幹李燔李道傳陳宓樓昉徐宣胡夢昱戴埴等官仍賜諡優恤各錄其子以旌



忠義勵士風建陽縣盜發焚劫邵武麻沙長平權邵武府王埜  
討平之六月戊辰朔宰相進遷德殿柱金書六字曰毋不敬思  
無邪帝銘之座右戊寅陳德剛簽書院事尋卒己卯追復濟王  
竑官爵癸巳趙葵帥師會知廬州全子才於汴金故將李伯淵  
等誅崔立以降秋七月蒙古聞宋來爭河南還師赴之決黃河  
寸金淀以濫我師兵多溺死時州縣多空城史嵩之又不致餽  
子才難之葵督促益急乃檄鈴轄范用吉樊辛李先胡顯等提  
兵萬三千監以置司機宜徐敏子先令西上楊誼以廬州強弩  
軍萬五千繼進各給五日糧庚辰敏子啓行乙酉張廸以二百  
人趨洛陽蒙古伏其軍於城外驅民出城以誘之廸見城中寂  
然至晚有民庶三百餘登城投降遂與敏子帥衆入城八月甲  
戌朱楊祖林拓謁陵回以圖進上問諸陵相去遠近及陵前澗

水新復楊祖悉以對上恐涕太息乙亥並命趙范趙葵全子才  
爲三京留守蒙古兵至洛城敏子引歸葵與子才亦棄汴楊誼  
未至三十里師潰僅以身免九月壬寅趙范劾葵與子才輕遣  
偏師趙楷劉子澄參贊失計誼與敏子用吉急於赴援致不能  
支詔各削秩貶葵措置河南京東子才措置唐鄧息各營田邊  
備罷放子澄楷敏子降吉武翼郎誼停勒自效時進士何鑑編  
類朱熹解註文字上謂有補經筵授上州文學冬十月己卯德  
秀進大學衍義十一月壬子除孟珙兼御前忠衛軍都統制招  
中原精銳萬五千餘分屯淩北樊城新野唐鄧間以備蒙古名  
鎮北軍十二月己卯蒙古遣王機以敗盟來責辛卯遣鄒伸之  
李復禮喬仕安劉溥報謝自是淮漢用兵無寧日矣

冊曰助金滅遼前禰立至助元滅金後災益熾明鑒了然

莫如省事威柄下移何能自遂

二年春正月丁酉淮安軍金棠縣天狗星墜有聲如雷化爲碎石其色赤占者以爲兵兆甲寅詔議胡瑗孫復邵雍歐陽修周敦頤司馬光蘇軾張載程頤程顥十人從祀孔子廟庭升孔伋十哲丙辰詔孟珙黃州駐劄措置邊防辛酉遣和州防禦程芾使北通好從義郎王全副之尋添差武功郎杜顯二月甲子朔日當食不虧三月乙未太學生陳均進宋長編綱目進士陳文蔚進尚書解並授廵功郎乙巳以陳綽簽書樞密院事夏四月追削鄭損秩謫居溫州簿錄其家尋竄南劍州丁卯都城火丁亥太白晝見戊子大閱五月乙未臨安軍民交開削御前都統趙勝三秩代以韓昱丙申大雨雹丙戌賜進士吳叔告以下及第出身已丑蒙古命太子闊端侵蜀漢以所獲金軍資庫使姚

樞從俾求儒學并醫術之人赴北狄七月蒙古兵侵唐州知隨  
州全子才知琅陽劉子澄棄城遁削秩既衡與瑞州趙范帥師  
敗之於上關而還冬十一月乙丑會從龍魏了翁督視江淮京  
湖軍馬詔給修武郎以下告身并金銀度牒緡錢爲隨軍資戊  
子安南國貢方物十二月庚寅從龍疏辭新命了翁獨兼督府  
壬寅陞辭詔許便宜行事授吳潛樞密都承旨與趙善瀚馬光  
祖並參謀議余燦同簽書樞密院事蒙古自鳳州入擣太安知  
大木軍曹友聞救却之友聞引兵扼仙人關辛亥雷 三年春  
正月己未朔以星行失度雷發非時罷天基節宴賜安南國王  
封爵襲衣金帶壬申蒙古兵連攻洪山張順翁大成等禦之隨  
州駐劄都監程再邁力戰有功二月甲午攻江陵統制李復明  
奮勇戰沒贈三秩官其二子壬寅詔近臣條具邊防事宜左曹

郎趙以夫上十策甲辰復召了翁赴闕以陳韓爲沿江制置使知建康府史嵩之淮西制置副使知廬州三月北軍將王旻李伯淵以襄陽降於蒙古凡失官民兵四萬七千財粟三十萬軍器二十四庫銀鹽鈔不與焉南軍將李虎乘火縱掠襄城爲空削制使趙范三官虎落刺史罷御器械捍禦自效階岷巖宕十八族諜者以檄招降曹友聞奏斬之夏四月癸丑上悔開邊下詔罪已五月蒙古取隋郢荆門軍六月庚戌大雨雹秋七月丁巳祈晴甲申雨血八月丙戌蒙古取襄陽軍大將武沒反欲坑士人姚樞力辯得免又拔德安府獲儒學趙復樞與同至燕自是北方始知經學樞亦得親程朱性理書焉九月辛未祀明堂大赦夕天雨震電冊免宰相清之行簡召崔與之復辭不至壬午曹友聞大戰於陽平關兵敗死之關端長驅入蜀陷成都利

州潼川三路并府州軍縣關隘盡沒惟存夔瀘順慶而已冬十月甲午口溫不花入淮西詔嵩之與韓應援壬寅破固始縣淮西將呂文信杜林因潰兵以叛據六安霍丘丙午闕端入文州守臣劉銳通判趙汝鼎死之十一月丙寅復行簡相位蒙古兵圍光州合肥復侵江陵孟珙敗之破二十四柵還俘民二萬侵真州知州丘岳敗之遂引去戊寅復成都府十二月壬寅改明年元癸卯清之辭職提舉洞霄宮甲寅池州都統趙邦永以援滁州功轉左武大夫餘立功將士具等第姓名推賞

嘉熙元年春正月丁巳賞程再暹爲閣門宣贊舍人京西鈐轄兼知隨州甲子詔江陰鎮江建寧太平池江興國鄧岳江陵遇兩淮荆襄避地流民各計口給米二月壬寅雨雹丙申忠義選鋒張順屈伸等以舟師戰公安有功各轉一官餘推恩有差癸

卯以朱熹通鑑綱目下國子監刊進經筵進講丙申贈宣化陣  
亡將校李仙王海李雄廖雷各爲武翼大夫餘官有差丙午詔  
夔路鈐轄知恩州田興隆獨戰大安德勝堡至潼川兵寡不敵  
忠節可尙特與轉官五月壬申臨安大火自己至西燒民舍五  
十三萬六月口溫不花攻黃州孟珙往救敗之又攻蘄州都統  
萬文勝知州徐巢城守論功補官甲辰祈雨丙午知黃州李壽  
朋被命不之官削三秩放建昌軍詔建內小學擇宗子十歲以  
下贊美者置師教之秋七月不花復侵安豐知軍事杜杲與池  
州都統呂文德合力敗之北師自淮西還己未樞密院奏制司  
參議官李曾伯廬州守臣趙勝都統王福等十一人戰守俱有  
勞效詔各轉一官八月甲辰詔蜀雞冠監都統王宣戰歿總管  
吳桂棗走削官勒停冬十一月戊辰詔沿江淮漢州軍備舟師

戰具防遏衝要堡隘十二月戊寅朔日食將旣復與金木水火四星俱躔於斗詔損膳避朝令有司檢會故實以聞二年春正月戊申朔詔近臣舉曉暢兵財者及三衙諸軍統制選舉將士具名以聞光州信陽二城共圍尅復二月蒙古再遣王檄來詔大理少卿宋楊祖送伴將作監周次說報之夏四月癸未丁黼爲四川制使兼知成都已酉雨土閏月壬申賜進士周坦以下及第出身五月癸未帝從喬行簡議以兵事委李鳴復財用委李宗勉楮幣委余天錫當會議者參酌而行秋七月趙以夫同知樞密院事壬午子維生踰二月天冬十月丁卯吳潛奏宗子趙時哽集真滁豐濠四郡流民十餘萬團結十七砦宜補以官就賣沙塲蘆田以贍流民籍強壯爲兵從之十二月乙卯減四川鹽酒榷額出祠牒會子共七百萬給制司爲三年生券戊



辰詔諸路和羅給時直平概量毋科抑申嚴苛禁 三年春三  
月甲戌孟珙復襄陽府及信陽光化軍夏四月壬寅祈雨秋八  
月戊戌朔浙江湖患告於天地宗廟社稷辛丑蒙古塔海復取  
成都丁黼敗死遂取漢中簡州閬州文州及遂寧重慶三府  
九月辛巳祀明堂大赦壬午賞廬州磨店北功轉淮西敢勇將  
陸旺李威三官同出戰二百人轉兩官陣沒者優與撫恤冬十  
月秉義郎守鄂州長壽縣李良沒於陣詔贈三官十二月甲子  
珙遣將分道禦北兵於蜀口遂復夔州 四年春正月辛未彗  
星出營室下詔罪已甲午犯王良第二星二月丙申朔大赦辛  
丑白虹貫日三月辛未彗星消伏夏四月壬寅前潼川運判吳  
申進對言四川制置副使彭大雅當蜀殘破能城重慶以禦利  
閭民懷思之請立廟祠祀又言張祥保全趙彥呐楊恢制置之

功敵人憚其果毅宜見錄用上嘉納之乙巳召諸之赴闕帝因其在鄂諸將皆捷眷顧益隆賜資無虛日五月戊子命吳潛兼侍讀李性傳兼侍講六月甲午朔浙江鄉建旱蝗乙未祈雨詔有司恤刑臣僚直言闕失冬十月癸巳改明年元十一月癸酉詔武功大夫荆鄂都統制張順以私錢招裹潰潰卒劍忠義虎翼兩軍及援安慶池州有功特與官兩轉十二月丙辰地震已未詔求直言

淳祐元年春正月甲辰詔曰孔子之道自孟軻後不得其傳至我朝周張二程真見實踐深探聖域千載絕學始有指歸中興以來又得朱熹精思明辨表裏混融朕夙讀學府論孟之書本末洞徹孔子之道益以大明其令列諸從祀以示崇獎之意至安石有三不足畏之說爲名教萬世罪人宜黜之丙午封惇願

汝南伯載郡伯顯河南伯願伊陽伯戊申幸太學謁孔子御崇  
化堂命祭酒曹鼎講大學賜師生官秩錢帛有差復製道統十  
三贊白鹿洞規宣示諸生三月趙以夫罷夏五月戊申賜進士  
徐儼大以下及第出身六月庚申螽秋七月壬辰祈雨冬十月  
蒙古主窩闊台殂妻馬真氏偕國政十二月丁卯蒙古遣使月  
里麻思等來至淮上守將囚之 二年春正月戊戌蒔之等進  
高孝光寧四朝國史及孝宗經武要畧寧宗玉牒日曆會要實  
錄三月孟珙出師禦蒙古將也可那延諸將稟命惟謹夏四月  
甲寅白氣亘天壬申雨雹秋七月自夏積雨浙右及常潤建康  
大水兩淮尤甚八月北兵侵真州杜杲擊敗之淮東先鋒馬軍  
鄧淳李海戰於揚州撻扒店宜勞居多各轉兩官忠勇軍統領  
王溫等戰天長縣東衆寡不敵皆沒於陣贈武翼大夫吉州刺

史補子興國保義郎更官一子承信郎厚賜其家餘人恤典有  
差九月庚辰朔日食辛卯祀明堂大赦冬十月乙丑北兵入通  
州屠其民而去追奪守臣杜霆出身以來文字竄南雄州仍詔  
諭兩淮制置李曾伯督勵諸將勉圖後功十一月己亥日南至  
雷電交作避殿減膳求直言 三年春二月乙丑呂文德爲福  
州觀察使侍衛馬軍副都指揮使總統兩淮出戰軍馬庚午詔  
郢州推官黃從龍死節贈通直郎一子補下州文學三月丁丑  
朔日食夏四月癸丑左武衛中郎將措置濠州捍禦王烈閣門  
宣贊淮西路鈴王杰閣門祇候江東路鈴李季實各往馬帥王  
鑑軍前議事遇北兵戰死贈官錄子乙卯襲固守嘉定守臣程  
立之轉一官丙辰安豐軍統領陳友直以王家珣戰功轉兩官  
壬申布衣王與之進所著周禮訂議補下州文學五月庚子詔

施州創築郡城及關隘六十餘所本州將士及忠州戍卒執役  
三年者各補轉一官秋七月丁亥詔密州之役海州屯駐保義  
郎申政先登陷陣而沒特贈保義郎官其子進勇副尉壬辰四  
川制司追論北兵破時忠義副總管楊世威堅守魚孔隘孤壘  
不降有特立之操擢知大安軍八月癸亥揀福州延祥荻蘆兩  
砦廂禁兵習水者各置武濟水軍閏月丁丑余玠上白土坪戰  
功轉知巴州向侔鈐轄譚淵十八人各三官其被傷者給緡錢  
沒者贈恤有差 四年春正月壬寅朔帝製訓廉謹刑二銘戒  
飭中外毋擅興暴掠虐殺無辜以慰中原遺黎之望二月卽潛  
邸建龍翔宮祀感生帝夏四月乙未祈雨五月丁巳詔武功大  
夫雄威軍都統楊价世守南邊連年調戍播州捍禦勤瘁特轉  
右武大夫文州刺史戊午呂文德解壽春府圍詔赴樞密院稟

議以兼淮西招撫使知濠州錄進勇副尉桂虎進義副尉楚富  
叶渾將虞候鄭蔡捍禦有勞各轉兩資及發緡錢百萬請兩淮  
制司犒師六月乙亥賜進士留夢炎以下及第出身秋七月己  
亥朔祈雨乙卯招收沿淮失業壯丁爲武勝軍辛酉盜發永州  
東安縣飛虎軍正將吳龍統制鄭存等討捕有功詔補轉官資  
九月癸卯史嵩之父病許謁告詔范鍾劉伯正暫領相事甲寅  
京湖制司官諸將李福等破申蔡州西平縣及馬家等砦詔各  
補官推賞嵩之父喪詔起復守臣敦諭赴闕士論汭湯臺諫獨  
無言冬十月甲戌帝夜降御筆黜不才諫議大夫劉晉之侍御  
史王翬監察御史龔基先胡濤獻明日擢劉漢弼左司諫十一  
月復因徐元杰上疏許自舉執政以代嵩之乃知不爲衆論所  
容疏乞終制帝尋許之五年春正月丁酉朔詔更新庶政綏

撫中原遺民準淳熙故事戒吏貪虐預借抑配重催取贏已酉  
雷二月丙寅朔雨土甲戌復五河縣加呂文德三秩牟洪二秩  
餘有功推賞陣沒贈恤發緡錢百萬犒師丁丑范鍾等上寧宗  
寶錄玉牒日曆及孝光二朝御集夏四月戊子余玠奏權巴州  
何震之城守而亡贈三官錄一子下州文學京湖奏鈐轄王雲  
等襲鄧州鎮平縣靈山戰順陽鐵檣略有功被重創死詔贈三  
官二子承信郎王寬王立田秀董亮董玉各加贈恤路鈐子江  
一軍力戰各轉一資北兵侵江陵孟珙等敗之詔珙與李曾伯  
余玠董槐王鑑職事修舉各與轉官因任五月丁酉呂文福帶  
行閑職夏貴轉兩官丁未從趙葵請沿江湖南江西湖廣兩浙  
及許浦各造輕捷戰船置遊擊軍分備捍禦秋七月癸巳朔日  
食潤常旱甚詔監司守臣沿江諸郡安集流民甲辰祈雨丁巳

京湖言總制亢國用帥衆戰裕州拐河墨山大神山皆有勞效  
詔轉兩官李山等一官北兵侵濠州呂文德敗之推恩將士有  
差九月甲辰京湖又奏劉整等率精銳以雲梯登鎮平縣城入  
而巷戰焚倉庫輿糧器甲路將武勝等四人死之復畧廣陽焚  
砦柵廬舍二十餘所還抵靈山又力戰有功詔轉整兩官同行  
蔡貴等各一官辛亥祀明堂奉太祖太宗寧宗並侑大赦冬十  
一月壬子錄死官守權成都府馮有碩權漢州王驥權成都縣  
楊兌權資州劉永權潼川魏霽各贈三秩錄子癸丑將領關貴  
統制白傳才率衆復洋州還遇北兵皆沒並贈承節郎祔享愍  
忠廟錄子進勇副尉併恤其家十二月甲戌詔壽春守臣劉雄  
飛呂文福林子宥等捍禦有功各轉三官雄飛知壽春府節制  
屯田軍馬劉用等補官已卯加皇弟與芮少保 六年春正月



辛卯朔日食避殿減膳講求闕政置國川所命趙與籌提領夏四月甲戌以丘岳兼兩淮賈似道兼斬黃皆屯田副使戊寅詔授朱熹門人胡安定呂熹蔡模並廸功郎本州教授仍給札錄其著述并條具所欲言以聞閏月戊戌呂文德奏今春北兵攻淮俘掠人民統制汪懷忠等逆戰趙家園拔還賞之知州王成倪政等帥舟師授安豐軍將士陣亡者衆詔贈政三官子承信郎許通夏珪孫才江德仙各兩官子下班祇應仍給錢恤其家癸卯余玠奏北兵分四道入蜀將士捍禦有功奉便宜推賞具立功等第補轉官資以聞從之秋七月蒙古主貴由始立無君者六年壬戌泉州饑部民謝應瑞出私鈔賑糴補進義校尉己巳北兵圍壽春總管孫琦呂文信夏貴等戰龍垵有功詔轉文信一官餘依等第轉補其陣沒董先等并傷者贈恤恩賚有差八月

已酉賜文士劉克莊進士出身以爲秘書少監兼崇政殿說書  
領史事 七年春正月乙卯朔詔諸大臣務舉實政以寧邦家  
若詞浮於實玩愒歲月朕何賴焉二月庚寅淮安主簿周子銘  
久俘於北數進蠟書諜報邊事特遇生還升爲朝奉郎己亥貴  
妃賈氏薨三月庚午祈雨夏四月庚子帝憂邊徼日至命趙葵  
督視江淮京西湖北軍馬聽便宜行事加趙希堅禮部尚書叅  
贊軍事陳韓安撫湖南兼知潭州出內庫緡錢銀絹祠牒并戶  
部銀廳用五月甲寅寧淮統制張忠成浮山手搏北將俱溺水  
死贈武畧大夫錄子承信郎優恤其家乙亥旱求直言令諸處  
講荒政掩遺骸六月癸巳賜進士張淵微以下及第出身秋八  
月辛卯雨辛丑贈前彭州守臣宇文景訥死事進三秩子下州  
文學丙子蔡抗進其父沈尚書解冬十月己酉監察御史陳垓

等上言添差攝局奏辟改任薦舉借補曠職匿過檢覆決獄十  
弊上嘉納之十一月丁巳郴寇害知茶陵黃端卿贈三秩子將  
仕郎正廟衡州十二月壬辰太學生程九萬自北來歸條上邊  
事賜迪功郎 八年春正月秤提會子七十八兩界永遠行  
用二月丁亥趙葵奏呂文德解泗州圍將士用命兵退陳奕譚  
涓王王成等又戰渦河龜山有勞其步兵多山東人轉調史用  
政等襲膠州高密以率制侵淮之師詔趣上等第姓名推賞癸  
巳雨雹乙未福州福安縣民羅氏母年過百歲特封孺人復其  
家勅有司歲時存問以厚風化三月蒙古主貴由殂甲戌詔泗  
州潮河壩之戰先鋒統制田智潤父子俱死贈修武郎并夏臯  
張忠立廟泗州賜額忠節官其二子承節與承信郎優恤其家  
夏四月丁亥贈死事程克巳朝奉郎妻王氏同沒進安人九月

辛酉祀明堂大赦冬十月己卯余玠奏都統張賓等第戰功承  
制轉三官給刺史象符并金銀器銀錢餘將士依等第轉官資  
賞詔從之 九年春正月庚申補周八世孫柴彥穎承務郎襲  
封崇義公辛酉詔軍民從便耕墾兩淮京湖沿江曠土成日官  
不分收仍諭制帥嚴勸覺察癸亥制慈幼并藥局乙丑雨雹辛  
未詔給表忠觀田仍禁樵採夏四月壬寅朔日食詔以丘岳屢  
戰多捷開職修舉命兼淮西制置使御書忠實二字賜之秋九  
月乙未冊婉容閻氏爲貴妃建功德寺於九里松賜名顯慶殿  
宇壯麗甲於靈隱天竺冬十二月戊申太白晝見 十年春正  
月立祔提會子殿最之法二月詔諸王府講綱目論語集解乙  
卯雨土夏四月己酉幸龍翔宮秋八月甲寅台殿大水復民租  
發義倉九月己巳賜進士方夢魁以下及第出身賜名逢辰冬

十月余玠出師至興元無功而還十一月壬寅雷十二月丁巳  
虹見十一年春二月乙未清之等上玉牒日曆會要及光寧  
二朝寶訓經武要畧三月辛巳城寶應移軍戍守進李庭芝秋  
將士推恩有差升僉典成都安撫副使知嘉定府措置威茂黎  
雅邊防夏四月戊戌潭州民林符三世孝行一門義居福州民  
婦陳氏笄年守志壽逾九十詔皆旌表其門丁未進淳祐條法  
事類凡四百三十篇六月蒙古主蒙哥立無君者三年甲子余玠進  
北馬五百疋丙申高達帶行遙郡刺史權知襄陽府管內安撫  
節制軍馬乙巳詔求遺書并山林著述秋八月丁未命呂文福  
爲御前諸軍都統制駐劄廬州庚戌故直龍圖閣樓昉上所著  
中興小傳百篇宋十朝綱目并撮要二書詔付史館磨寫追贈  
待制辛亥上覽林光世易範明易推星配象演義命有司以禮

津遣赴闕承信郎陳忠亦獻書轉官九月辛未祀明堂大赦十  
一月丙申京湖奏聞復襲樊功都統高達以下將士三萬二千  
七百人各官一轉犒緡錢三百五十萬十二月戊辰詔以八事  
訓飭在廷肅紀綱用正人收楮幣固邊陲清吏道淑士氣定軍  
制結人心十二年春正月辛丑太學錄楊懋卿孝行卓異旌  
表其門癸丑宰相以國用不足議立方田開溝洫自近圻始二  
月乙卯朔日食北兵攻隨郢安復京西副總馬榮率將士戢嚴  
寶山銅冶坪大脊山兵不滿千能禦大難詔官兩轉帶行閣門  
祇候賜金帶諸將王成楊進各官兩轉餘推恩有差三月丁未  
守三汊口焚北屯積斷其浮梁夏四月戊辰詔復襲樊郢州惟  
耕屯爲急務措置屯田修渠堰山緡錢百萬命京闕措置牛種  
丙子創置沿江遊擊軍水步各半五月甲申朔祈雨壬辰申儆

江防葺戰艦練舟師以勤惰殿最賞罰乙巳盜起玉山縣罷諸  
郡經界六月癸亥平之丙寅嚴衢婺台處上饒建寧南劔邵武  
同日大水遣使分行振恤除今年田租秋八月己未詔復二月  
省試四月殿試免滯遠方士子丁丑行新製會天曆辛巳改明  
年元冬十一月丙申夜臨安火次夜乃熄避殿減膳求直言十  
二月己未追錄彭大雅剗城逾州功復承議郎官其子癸亥詔  
春秋遣從臣往祀海神丁丑立春雷

寶祐元年春正月庚寅朔立皇子孜癸卯北兵渡漢江屯萬州  
入西柳關高達調將士扼河關上山大戰至鰲坑石碑港而還  
二月己酉朔日食戊辰陳垓以貪竄湖州辛未罷尚書省劄置  
呈白房三月戊子授宗室希遷少傅乃裕保康軍節度使各加  
食邑有差夏五月己亥賜進士姚勉以下及第山身六月戊申

朔江湖閩廣旱祈雨秋七月庚寅溫台處大水振之癸巳以余  
玠與元歸附兵分隸本路諸州務撫存之各給良田濟以錢粟  
八月乙丑行皇宋元寶錢九月壬辰城夔門二年春正月詔  
旌表湘潭縣民陳克良孝行二月乙巳北兵城利與閬州統制  
呂達戰歿贈四秩官二子永信郎下班祇應庚申饒州奏布衣  
饒魯不事科舉一意經學詔補廸功郎本州教授王善使北留  
七年三月壬午始歸己丑錄襄城功高達帶行環衛官遙郡團  
練使程大元李和以下將士六千六百餘人補轉官資有差甲  
午賈似道上城東海圖夏四月辛亥詔邊兵耕墾閒田六月甲  
辰制司奏北兵入廣安軍守臣曹世雄等戰禦有功各補轉官  
資丙辰利州王佐堅守孤壘愧還降將南永忠詔進一官其不  
從降隆慶教授鄭炳孫妻女同縊贈朝奉郎直秘閣仍訪其子



官以文資閏月甲戌錄嘉定功北兵圍城五旬帥守俞興元用等十六人夜開關力戰而解詔各轉五官將士補轉有差乙亥台州海寇積害路分董櫛泊進士周自中等擒獲詔轉一官餘皆推賞秋七月詔思播兩州連年捍禦守臣田應庚楊文各轉一官餘推恩八月乙亥下前知閩州兼利西安撫王惟忠於大理獄命臺臣監鞠斬之籍其家癸巳謝方叔等上玉牒日曆并中興四朝志傳及寶祐吏部七司續降條令九月辛亥祀明堂大赦丙寅山陰蕭山諸暨會稽大水除今年田租冬十月戊戌段元鑑上隆慶堡戰功部兵周榮被獲密約入降解圍事覺就禽不屈而死馬徵白端戰歿詔撫司立廟十一月丁未北兵城光化舊治十二月癸未雷四川苦竹隘獻捷安西堡受攻五月將士力戰解圍在城居民以資糧來助詔撫司具名推恩並賞

一資復租賦五年 三年春正月己未迅雷從牟子才言罷元  
夕張燈庚申均州築城龍山巴州獻捷壬戌詔宗正寺所擬宗  
子名以用宜季次紹五字續大山友嗣甫之下二月己卯復廣  
陵堡城賈似道以圓來上乙酉出告身祠牒新會香鹽命臨安  
守馬光祖攻換兩界舊敵會子三月己酉詔沿邊耕屯課入登  
義推賞荆襄兩淮屯營諸將及山砦亦如之己未雨土夏五月  
久雨辛酉嘉定大雨雹與叙南同日地震浙西大水六月丙戌  
李全子松壽葺舊海城窺海道賈似道調兵敗之勅書獎諭秋  
七月癸丑呂文德知鄂州節制鼎澧辰沅靖五州丙辰謝方叔  
徐清叟被諭解職詔令董槐程元鳳輪日判事取旨 四年春  
正月帝下御寶黃冊催內藏坊場錢知嚴州吳玘奏論董朱臣  
諷臺諫劾罷之二月戊辰以蒲擇之爲四川制置使知重慶府

三月丙辰帝製字民訓賜親民官夏五月甲午賜先聖孫孔元龍迪功郎甲辰羅氏鬼國遣思播報言北兵屯大理國取道西南將大入邊詔以銀萬兩使思播結約羅鬼爲援丁未詔申嚴老鼠隘防戊甲寅賜進士文天祥以下及第出身六月甲戌太府寺簿朱禕孫知澶州兼潼川路安撫長寧澶叙邊防癸未董槐罷元鳳蔡抗依舊輪日判事取旨秋七月甲寅知叙州史俊調舟師與北兵戰十三合詔官三轉帶閣門宣贊舍人九月壬辰西南蕃呂告蠻目寧名天兄弟慕義與烏蘇蠻合力爲國禦難詔各補承信郎十一月戊戌詔蜀羅兵革所當勞撫使之樂業此聞官吏大肆誅求殊失本意自今制司戒飭違者罪之十二月庚申北兵城棗陽爲犯襄鄧計是歲浙江堤成蜀與襄樊荆關各奏捷詔獎諭趣上有功將士姓名等第推賞五年春

正月乙巳雷二月丁丑布衣余一飛高杞陳襄陽備禦策命趙  
葵施行夏四月丁卯北兵侵襄陽高達破之於白河轉行右武  
大夫帶遙郡防禦使己卯被苦竹隘守將楊立張實死之詔蒲  
擇之及京湖調兵應援閏月祈雨甲午北兵犯安南詔徐敏子  
嚴防邕宜築宜州城己酉呂文德知靖州田應寅乞屯瀘淑以  
援思播分洞兵以扼施黔詔築思州三隘五月庚申雨丁卯城  
荆山置懷遠軍以夏貴知軍事正任吉州刺史帶御器械辛巳  
蒲擇之復劾門聖命轉兩官米禔孫蒲黼楊大淵韓昇各轉四  
官秋七月己未太白晝見八月丙戌台州火丙申臨安火九月  
辛酉祀明堂大赦冬十月癸巳雷甲午虹見丁酉林存發書樞  
密院事十一月己丑獎諭安南賜金器幣香茗乙亥詔京湖  
帥臣分置黃平清浪平溪屯戊十二月蒙古主自將南侵由隴

州趙散開莫哥大王由洋州趨米倉李里義萬戶由漁關趨河  
州是歲四川嘉定并光化軍各奏捷 六年春正月辛亥朔林  
存恭知政事蒲擇之帥師復成都克而還甲戌出封樁庫銀  
命密院編修呂逢年詣蜀圖趣辦屯耨工役糧餉相度黃平恩  
播諸處險要緩急事宜具以上聞戊寅雷二月壬辰雨土三月  
辛亥朔祈雨自冬徂春久亢民失東作詔避殿減膳夏四月甲  
申大雨宰相表請御殿丁酉擢田應已御前忠勝軍副都統制  
思州駐劄往播州共築開隘丙午林存同知院事北兵圍襄陽  
樊城高遵程大元救却之五月庚戌朔諭功激賞與城守李和  
咸進官癸丑哨達通泰州及安豐軍守臣迎拒之繼而懷遠連  
水軍皆奏捷轉夏貴兼河南安撫使毛興右武大夫並因任秋  
七月庚戌長寧軍修陵霄城完進朱禰孫官易士英帶行閣門

宣贊餘轉官有差戊辰蜀郡劉整上捷詔推恩賞乙亥呂文德  
入播州給以封樁銀八月戊戌蒙古主次劔門詔上流鎮江防  
禦癸卯倭船入界詔闕廣海道中嚴防迨九月甲寅再詔安南  
情狀固測中傍邊防冬十月丙子朔上以成都諸將暴露日久  
雖未尅復戰功亦多宜與序升命亟條具以聞丁丑擢俞興四  
川制置副使兼成都安撫知嘉定府乙酉知隆慶府楊禮守安  
西堡有功進兩官庚寅廣南劉雄飛奏橫山功轉三官部兵將  
校兩官置橫山屯十一月己酉林存罷知建寧府癸丑潁州上  
戰功詔亟推賞以示激勵甲寅築黃平賜名鎮遠州進文德三  
秩呂逢年一秩丙辰給事中張政論徐敏子襲帥廣右嗜殺黷  
貨流毒桂府詔羈管隆興府丁卯東海失守甲戌兵退詔似道  
以功自贖特與放罪十二月戊寅改來年元庚辰北兵入蜀馬

開慶元年春正月乙巳朔詔飭中外奉公法圖實政丁未隆及雅州皆降於北分兵各進已酉由忠潛趨夔境詔擇之光祖便宜行事辛亥犒蜀師庚申兀良哈入賓象州知州呂振龍奚必勝遁並追出身文字竄於遠方橫州守劉清卿設隘堅守轉一官至靜江李會伯閉門自固破利州降慶順慶諸郡聞遂廣安守將相繼納降遂造浮梁於涪州之蘭市勢將順流東下命印應飛知鄂州兼湖北轉運使馬光祖江東安撫使兼知建康府行宮留守賈似道提舉兩淮兵甲兼知江陵府二月庚辰趙與憲字本爲兩淮制置兼知揚州三月丁巳蒲擇之免轉呂文德保康軍節度使四川制置副使兼總領財賦知重慶府李迺龍權州部侍郎各賜金幣夏四月乙酉知施州謝昌元自備錢

粟築城有勞詔轉一官五月甲辰朔城金與開州乙卯達州上  
文德等賞募壯士斷橋通道有功加檢校少師領馬軍行司選  
補將士有差丁巳恤湖北旱饑乙丑行開慶通寶錢辛未賜進  
士周震炎以下及第出身時昇國公主當選尙丁大全欲用震  
炎爲駙馬公主問其年幾三十不悅降爲第五甲出身六月甲  
戌文德入重慶諸諭軍民奮勇效死有功行賞靡問遐邇有能  
效順來歸悉當宥過加恤史天澤來侵戰於嘉陵江文德收績  
八月忽必烈自黃州渡江侵臨江軍知軍陳元桂死之遂次於  
陽邏泐築壘岸側京湖江淮州縣多降之戊子申嚴海道防禦  
九月壬子董文炳圍鄂州朝廷大震丁大全置不以問吳潛涕  
泣入奏內侍董宋臣要帝遷都皇后諫止之庚申下詔罪已徹  
樂減膳避殿求百免諭諸閭進兵出內府緡錢銀帛給宣司及



沿江副閫以犒師命御史陳寅趨淮東調兵五萬應援上流再  
出內庫緡錢銀帛給兩淮沿江制司以備軍費己巳詔似道兼  
節制江西二廣人馬通融應接冬十月辛未朔丁大全罷壬申  
吳潛似道督師並屯漢陽癸酉復轉趙葵建康移馬光祖江州  
副使史巖壽昌皆以應援權鄂州事都統張勝因危急登城語  
北兵曰城子已爲汝有但子女金帛皆在將臺可從彼取北兵  
信之焚城外民居將退會達與應飛兵至乃復進攻勝堅守不  
下死之乙酉雷癸巳哈友入辰沅復圍潭州知州向士璧拒退  
之癸卯北兵陷漣水軍揚州大震以文福帶遙郡防禦河南招  
撫使知淮安軍丙辰詔選招信泗州精銳千人揚州拱衛軍千  
人安豐濠州各千五百赴臨安聽調庚申夏貴入見帝撫勞甚  
至十一月上聞鄂攻益急詔出內帑緡錢五千萬犒內外諸軍

閏月北兵退甲申命呂文德知鄂州加檢校少保侍衛馬軍都  
指揮使兼京西湖北安撫制置屯田等使十二月己亥朔詔鄂  
與潭州聞解論功行賞辛亥改來年元是歲褒錄雲頂山諸處  
死節士各官其後贈隆慶府段元鑑安西堡楊禮奉國軍節度  
使封開國侯立廟賜額予爲成忠郎濠州統制張斌柘塘戰歿  
贈三官一子下班祇候知播州楊文知思州田應庚守禦勤勞  
各轉一官有功諸將幽林帶行巡郡刺史文通轉武功大夫賜  
資有差

景定元年春正月丙子褒獎似道賜金器幣遣國子劉錫趣召  
赴闕二月己酉擢高達寧江軍承宣使右金吾上將軍知江陵  
府湖北安撫副使兼夔路策應與文德各賜緡錢及浙西良田  
贈張勝官錄子煥進武校尉戰守將士分資有差孫虎臣和州

防禦使陳奕阮思聰俱賜金幣並因任王鑑蘇劉義張世傑以下各優進秩瑞州陳昌世治郡雖善兵至逃遁削秩勒停辛酉從向士璧奏衡州劉雄飛逆戰俘民獲還者衆詔授保康軍承宣使餘轉官賜資分寧河朔皆都監權巡檢張興宗戰死贈武翼郎官一子永信郎給其家緡錢三萬丙寅旌湖南守禦功諸將溫和平左武大夫遙郡刺史李虎閣門宣贊鄧進復州團練使皆帶行仍賜銀絹俄罪李虎馭軍無律寬之鬱林三月戊辰朔日食有白氣如匹練亘天移似道鎮黃州貴兼黃待策應總諸將升師敗敵殿卒於新生洲冒功遷福州觀察使又殺俘卒冒奏藉草坪功轉范文虎左武大夫遙郡防禦使張世傑孫虎臣並爲環衛官賜金帛夏四月蒙古主忽必烈立癸丑似道入相五月壬申追論史巖之北兵退始命程芾出師以致敗事落

職解官壬午災惑入南斗留五十餘日甲申祈雨六月丁酉朔  
升巢縣爲鎮巢軍壬寅立忠王爲皇太子壬子賜李遇龍金帶  
陳奕帶御器械鎮江駐劄御前諸軍都統制并賜田秋七月丁  
卯朔皇太子受冊大赦戊子忽必烈遣翰林學士郝經持書申  
好來告卽位且徵歲幣上語宰執北朝使來事體當議似道使  
人拘之真州癸巳詔舉孝廉九月癸酉知瀘州劉整以功來上  
辛巳祀明堂大赦戊子蒙古王文統陰扇李松壽犯淮安詔申  
嚴邊備冬十一月壬子破之於漣水城十一月丙寅洪熹知臨  
安府兼浙西安撫使壬午以中軍統制知簡州馬千樞爲興州  
都統兼知合州十二月甲午朔出華亭奉宸莊隸外廷助軍餉  
辛丑建陽縣嘉禾生改名嘉禾縣乙卯少師廬陵郡王思正薨  
諡簡惠印應雷直徵猷閣知江州主管江西安撫司公事節制

黃興國三郡是歲獨蜀與江西湖南被兵州郡兩稅錄橫山  
效節將士總管張世雄沈彥雄陳喜泰安李孝信鄭俊李安國  
各贈官賜錢恤其家

冊曰姦臣迭興國事已去執德不弘何能終譽

二年春正月癸亥朔似道專政詔監司具劾去賊吏名數來上  
率半歲爲殿最守臣以一歲爲殿最若無所劾而臺諫論列者  
一體定罰其有治狀兼著據實以聞丁丑皇太子詣太學釋奠  
孔子二月丙申孫虎臣戰邳州全師而歸三月壬戌朔日食乙  
亥論援蜀功贈故寧遠軍承宣使張祥節度使都統制閻忠進  
復州團練各官一子承信郎賜以緡錢戊寅宰執上玉牒日曆  
會要經武要畧及孝光寧三宗實錄詔各進秩夏四月癸巳朔  
追毀余思忠出身文字除名竄新州乙未何夢然簽書樞密院

事俞興保康軍承宣使與劉整有隙命爲四川安撫制置使知重慶府乙巳除呂文福帶御器械淮西安撫副使兼知廬州五月戊寅劉雄飛加和州防禦樞密都承旨知夔州兼夔路安撫使六月乙未霖雨爲災湖秀尤甚詔避殿減膳講行荒政辛亥范文虎再除左領軍衛大將軍主管侍衛馬步司秋七月甲子俞興考覈劉整軍前錢糧整遂叛率所部北降制司叅謀官許彪孫死之自是北人愈易宋而邊釁日深矣辛未蒲擇之坐密通叛賊羅顯蠟書竄萬安軍徙南康乙亥厲文翁以資政殿學士沿海制置使知慶元府戊寅王惟忠案訟冤詔奪謝方叔合得恩數臺臣吳燧褫職罷祠陳大方胡大昌皆錮官八月壬辰命韓宣兼常德辰沅澧靖五郡鎮撫使呂文德兼四川宣撫使九月乙亥李庭芝奏郝經久留真州帝趣與錫賚冬十月癸巳

文德復瀘州外堡擬對江壘石爲城以示持久之計從之丙午  
沈炎罷何夢然同知樞密院甲寅皇太子擇配十一月己未朔  
奪俞興職劉雄飛代知重慶府總領夔路轉運安撫制置副使  
十二月甲午以何夢然叅知政事兼太子賓客 三年春正月  
戊子朔似道專政執政何夢然臺諫孫附鳳桂錫孫劉應龍等  
承順風指凡所惡者指爲丁大全吳潛之黨永不錄用壬戌崇  
獎耆年奉祠林彬之寶章閣待制史季溫直華文閣丁仁直寶  
謨閣並授以祿甲戌錄權梁山軍李鑑守城有功帶行閣門宣  
贊舍人就知本軍復收瀘州爲江安軍獎立功叅贊將士職秩  
犒賞有差二月臨安僞詔振貧民丙午孫附鳳簽書樞密院事  
兼賓客戊申詔御史臺復試中選士人以爲定制庚戌李璫以  
漣海三城來歸并獻山東郡縣詔授保信寧武兩軍節度使督

視京東湖北等路軍馬封齊郡王復其父全官爵收連水爲安  
東州升東海縣爲軍三月丁丑汪立信差知江州主管江西安  
撫司公事庚辰呂文福差知濠州兼淮西招撫使夏五月己巳  
詔廣西靜江經畧安撫措置屯田有效其令邕欽宜融柳象潯  
韶州守臣課以殿最條具來上丁丑賜進士方山京以下及第  
出身庚戌夏貴上新縣戰功六月戊子李璣受圍韶給銀錢犒  
師援師不至而還庚寅孫附鳳權叅知政事庚戌安南陳日照  
表乞傳國於其子威見詔授靜海軍節度觀察處置等使檢校  
太尉兼御史大夫上柱國安南國王賜號効忠順化功臣并金  
帶器幣鞍馬秋七月壬申江州都統聶世興調遣入蜀託疾憚  
行詔奪二秩押往京湖制司自效戊寅侍御史范純父劾前制  
使俞興妬功啓戎罷任罰輕詔削秩甲申夜有白氣亘天八月



甲午海州石湫堰成進知州張漢英帶行遙郡刺史馬步軍副  
總管丁酉蘄州城成汪立信以圖來上詔獎諭知州王益正任  
高州刺史戊戌李璫兵敗被誅事聞詔沿邊諸郡嚴謹邊防升  
汪立信直敷文閣兼主管沿江制置司公事召陳奕赴樞密院  
稟議丁丑温州奏布衣李元老讀書安貧不事科舉年一百四  
歲詔補迪功郎給其奉閏九月戊申紹興府火詔貸居民錢勿  
徵冬十月乙卯蜀四川總制鹽酒權額丁卯呂文德奏功失實  
所遣將校禦敵多逗遛不進詔削呂文煥王遠趙真兩秩王甫  
一秩餘貶降有差甲戌歸化州岑從毅納土輸賦詔改名來安  
州進從毅修武郎世襲知州事丙子升安豐六安二縣爲軍十  
一月丁酉資陽砦主萬戶小哥及其子衆家奴來降詔賜姓名  
王永堅補武翼大夫夔路副總管重慶府駐劄戊戌以夏貴知

廬州充淮西安撫副使丁未皇孫焯薨十二月辛巳呂文德辭  
兼四川宣撫詔仍爲策應使是歲以國用不足詔行經界推排  
法寸田尺土皆入官籍東南大擾四年春正月壬午朔似道  
專政議限田以品格爲制抽回官戶田產逾限之數三分之一  
轉買以充公田計得一千萬畝歲收租六七百萬石可免和糴  
造幣學士徐經孫著作郎陳著言不便罷之二月丁巳置官田  
所以知臨安府劉良貴爲提領通判陳訔廖邦傑爲檢閱己未  
詔近臣各舉所知林希逸奏蒲陽布衣林亦之陳藻有遁之士  
林公遇幼承父澤奉親不仕詔贈亦之藻迪功郎公遇元官上  
贈一官乙亥獎呂文德浚築鄂州常澧城池進爲寧武保康兩  
軍節度使轉守臣韓宜遙郡承宣使蘇劉義吉州刺史戊寅北  
使王德信劉公諒來詰稽留郝經之故三月丁亥擢雄飛樞密

都承旨四川制置使總領財賦朱禕孫太府卿因任丁酉呂思  
望知濠州兼淮西招撫使丁未獎知寧國趙汝樸推行經界不  
授而辦職事修舉升直華文閣因任夏四月丙寅知嘉興段浚  
知宜興葉哲坐買公田不遵元制俱罷六月壬子祈雨乙卯臨  
安火庚申公田竣事計平江江陰安吉嘉興常州鎮江六郡共  
得田三百五十餘萬畝立四分司主之每鄉置官莊一所官督  
民耕富民充莊官其荆湖江西諸道仍舊和糴丙寅賞功提領  
以下洎六郡官進秩有差庚午宰執進玉牒日曆會要經武要  
畧及徽宗長編寧宗實錄詔皆轉官秋七月壬辰勅令所進寧  
宗以來寬恤詔令北人以計誘呂文德置榷場於樊城外通互  
市內築堡壁反資敵出兵哨掠其成益熾九月甲申轉汝樸太  
府少卿淮東總領財賦辛卯祀明堂大赦甲午何夢然知樞密

院事冬十一月己亥福州火十二月丁未朔詔皇太子日講  
五年春正月丁丑朔似道專政自寧宗世會子壅滯民不堪苦  
帝命出奉宸庫雜物官收敝會及不用十七界者至是更造金  
銀見錢關子以一準十八界之三行之物價益貴庚辰詔崇經  
術考德行依二程綱條選士舉賢夏四月丙午詔管景模妻卒  
陷沒效忠愈堅所得俸入率以撫士特賜緡錢金帶丁未進夏  
貴樞密都承旨知重慶府兼四川安撫制置總領夔路轉運等  
使乙卯信陽軍將余元友提兵防護春耕有功補轉官資五月  
庚辰何夢然罷乙未安南國奉表謝恩兼進方物六月甲辰朔  
衢州詹沔因都吏徐信苛取激變寇掠常山詔斬信籍沒知州  
謝暨削秩勒停甲寅朱禔孫以右文殿修撰知靜江府充廣西  
經畧使戊午祈雨秋七月甲戌彗星出柳長數十丈自四更見

東方曰高始滅避殿滅膳求直言己卯彗星退於鬼辛卯退井  
甲戌京城大火乙未知嘉定洪濤言新繁縣太祖御容殿前枯  
木再榮順化人楊嗣光奉太宗及真仁英神四像來歸迎赴行  
在所補嗣光武階兩資戊戌彗星退於參八月戊午彗星消伏  
甲子復見於參辛未化爲霞氣冬十月乙丑帝有疾不視朝丙  
寅大赦丁卯崩在位四十一年壽六十一諡曰建道備德大功  
復興烈文仁武聖明安孝皇帝廟號理宗

冊曰魁聚而興彗哆而亡運可轉移道不可喪始崇正學  
卒荷表章列聖沒明羣儒益昌百代遙遙日皎天光